

蠶業下

凡上所言皆蠶學之原起也其事理竝森楷是而他人非其機宜竝森楷得而他人失讀者得毋疑今日之事我爲政無稽之言可勿聽乎則請于文牘徵之

發起人張森楷等籌款濟公協懇立案案并批清光緒二十七年三月

緣舉森楷去冬在渝得晤湖北知縣井研施煥自言因公赴鄂出其前同日本領事堺與三吉所司四川蠶桑學堂章程及照譯日本政府行知農學堂覆信竝教習履歷器具價單各件囑爲集股接辦因邀代理日本領事井戶川辰三本府書院山長何榮楠呂翼文彭致君商務局委員吳淞姜國銓暨生重光職汝光等面立承辦付辦合約今正領事山崎桂到任森楷赴渝會議疊經往復函商諗悉學堂係屬官款官辦初無言利規條此爲招股集費民款民辦之舉頗與杭州福州武昌各省學堂不同應仿蘇州梧州贛州儀徵無錫金匱等處農學蠶桑公社

合川縣志卷二十 蠶業下

一

會總局辦理擬改名爲四川蠶桑公社湊足股本銀一萬五千兩以備延師購器租地造屋開社等費別爲試辦章程二十六條粘附呈政現在集股已過萬金公社基地亦經舉致中職春坊顯珣等踩得大河壩場左近之太和觀院宇田業全坵足供種桑養蠶之用由僧立約租佃即可開社辦理惟念事關全省興利任重道遠負荷良艱舉等一無憑藉但就同志諸人集腋成裘雖云眾擎易舉猶恐收銀之時稍有觀望情形未能一律踴躍即致諸多窒礙因集舉世燿職紀鍾等公同籌議擬照贛州儀徵兩處官督紳辦之法懇 恩督辦公社事務竝查州中公款現有各倉積穀餘利四成八百石向章提作學費本年學費款項充足無須復提似可借撥入社俟三年後略有成效隨時停止仍由本社分年歸還又有濟倉溢類穀外存銀一千六百兩零經前任稟詳藩憲批俟穀價平減買穀存倉歷今兩政皆值穀價騰涌未能收買現 恩交代在近似可暫借入社將來穀價稍平不拘何時隨提全還但係列入交代之項應否稟詳各憲抑或移交新任商酌之處均出恩裁又有石泉庵僧心義等施田租七十石入學費局由局給銀五百兩交

光裕公鹽號生息支用春間心義病故絕無徒嗣其別房僧普濟自向
職紀鐘言明心義存銀伊等不合預聞但能稍撥利息爲其老廟添瓦
整蓋卽爲無量功德職紀鐘面允兩悅無異此項銀兩似可全數撥入
公社作爲底本以資補助爲此協轅陳明懇請賞查分別立案飭遵俾
得有恃無恐集事較易舉等幸甚全川幸甚伏乞

批蠶桑爲中國自有利益該舉人等興設蠶桑公社果能實力舉辦
將來獲利必厚後所議官督紳辦旣仿他處辦法事屬可行至僧心
義施項旣係絕款其各鄉積穀倉利四成穀石現時學費局無須提
用業係眾議僉同亦可借撥惟濟倉存銀係稟准作爲買穀之需似
難暫借入社本署州交替在卽以上各節統候移請新任作主辦理
可也粘章附

四川蠶桑公社股友忠州進士何榮楠等公舉執事專請游歷懇詳立
案案并批二十七年四月

緣貴治舉人張森楷去冬在渝議辦四川蠶桑公社擬立章程二十六
條內載招股籌款延師購器製具種桑等目責成督辦總理協理提調諸

執事分股各辦請憑紳等領首集股均各悅從森楷旋偕商務局委員
姜國銓到州會同中書科中書曾紀鍾候選從九易顯珣等查得治屬
絲業最盛之大河壩場舊桑較多其附近太和觀院宇田土全業足供
種桑養蠶之用由僧立約出佃卽可經理開社猶慮股款或不踴躍諸
多窒礙不便復在治屬集眾籌議借撥地方公款入社暫墊後償皆允
無異森楷等因以籌借濟公詞具稟前政沐批分別准俟移交恩廉在
卷月初森楷赴渝同謁日本領事山崎桂擬照原章訂約簽字据山崎
議教習繙譯身價過輕須得酌量加重等語紳等切思蠶桑之學及其
應用器件誠推日本最精然其人工索價稍賒本社財力有限斷難勉
強從事且關中東交涉萬一變生意外後累滋多現查農學商務等報
盛稱杭州武昌等省蠶桑學堂著有成效堂中卒業高等學生堪充教
習之選不如公請一人由鄂赴浙竝到日本學堂機廠游歷攷求人工
物用究以何地爲宜若其必須東人又肯降心相從自依原章定聘爲
是否則作爲罷論但購各器回川備用眾議協定交推森楷前往森楷
慨承無難唯言立社本意原期開通風氣義利兼權雖與他省學堂官

款官辦者不同究係地方公事此三次出辦延師購器等件固不專用洋人必要親到日本應請海關道憲賞給護照單並照會日本領事行知該國政府准予任便游歷憑据始可進行無阻至于社中原立總理協理提調諸執事曾未指派何人惟督辦一職經懇前政兼管亦係下情推戴初無上憲札文未足以昭鄭重似宜併懇海關道憲查照章程內事權條分別賞札飭遵用資信守^紳等甚韙其言所有本社督辦仍懇恩廉兼管竝舉森楷總理國銓紀鍾協理顯珣提調呈請道憲分札委充第念借款之舉事出非常貴州概允移交具見官紳一心見義勇爲致足欽佩今不由州轉詳遽爲就近呈稟道憲既與體制不合亦于事理非宜是貝合詞遣呈懇請賞批附案併查前稟籌借濟公詞由及所粘附章程轉詳道憲立案給予札憑照令行知實爲公便沾感伏乞批据稟已悉查川省土產以絲爲最獲利極溥但絲出乎蠶蠶需乎桑而桑又繫乎土性是欲求蠶肥絲多固宜先悉飼育栽培良法要必有法變化土性庶幾款不虛糜收效較速卷查舉人張森楷等前具公稟係爲開通風氣振興利源起見所議章程二十六條亦稱周妥惟是初辦之初需款甚鉅集股尤難延師購器備種等項在在需費該舉人張森楷雖允躬往游歷攷究工用一往返間必須一年公社未開股款自須先集見效遲速尙不可必而成本已甚重矣川省人心浮動見利必趨設舉行無效難免訾議雖有定章爲之奈何至學田息穀濟倉盈餘銀兩均稟上有案未便挪移僧心義施項每年尙應給該寺香燈錢四十釧卽係絕業可撥杯水車薪恐難濟事且蜀土氣薄迥非外洋可比欲效日本每歲育蠶五季恐爲事所難能縱令三年有成未免有得不償失之慮本州未諳此中肯綮亦不敢任兼管之責管見所及特詳說之仰卽邀同原稟諸紳通籌熟計必使萬無一失然後試辦逕赴道轅稟請立案可也

川東道寶案札飭合州据實通稟覆報查攷案

二十七年七月

案据該州舉人張森楷等爲試辦蠶桑公社擬赴東洋游歷懇給護照免單賞飭立案備查事云云等情據此當經本道批詳閱附粘章程具見該舉紳等留心時務欲爲全川興蠶桑之利期獲利益於無窮殊堪嘉許但既在州租地開社并請地方官督辦其總理協理各項執事復

須請道札委又須動用本地公項似係紳民集資官爲督辦且試辦一年後果有利益進境當分別奏咨准予專利年限竝限制通省只能聘請本社學生充當教習以及代驗收費事關全省商利必須慎始方能圖終究竟所議章程是否妥洽官督紳辦由道分別給札及動用公項各節有無流弊窒礙所集股本果否實在仰候据情札飭合州楊牧確加攷核妥爲籌議如果事屬可行卽由該牧通稟各大憲暨 商務總局核准後再行酌給單照并候行府知照所刊章程該舉紳等卽再補送兩分來轅以便分發切切此繳章程存批示在案除行府外合行札飭札到該州卽便確加攷核妥爲籌議如果事屬可行卽行通稟各憲核示并報本道查攷毋違此札

合州知州楊鼎昌稟覆川東道并批

二十七年八月

案奉憲台札開据 卑州舉人張森楷等以試辦蠶桑公社擬赴東洋游歷懇給護照免單賞飭立案備查等情一案飭卽確查攷核章程是否妥洽官督紳辦動用公項各節有無流弊窒礙集股是否實在妥爲籌議如果可行由州通稟核示并報查攷等因計分發章程一分奉此遵

合川縣志卷二十 蠶業下

四

卽細繹專章確加攷究正籌議閒旋据舉人張森楷以籌借濟公詞稟前州批准移交辦理 紳榮楠等復以公舉專職等詞稟案沐批指出疑難各節飭令自赴道轅呈懇在卷具見審慎周詳莫名欽悚遵集會渝集議僉稱原章集貲一萬五千金分作百五十股昨五月廿六日初開頭關照章收取股銀四分之一綜計在鄉在合在渝實已收銀百三十股餘二十股未齊現有本社聯根關票可查擬于此數內提出五百金交付森楷作爲主傭二人由鄂赴浙竝到東洋學堂機廠游歷半年經費免蹈恩批往返經年所耗不貲之憂惟東洋每年育蠶五季之法川中土宜能否施用化學肥料一律照辦尙須考求歸來試驗以後方有把握不敢竟据農學商務等報所言堅愎自信致負恩廉裁成之意其原議借州中地方公款二項旣係通稟各憲有案之件碍難擅動僧心義施款一項雖准提用但經光裕公號掌放生息號東秦鳳五現赴行在供職歸還需時均可暫置不論現在各省興辦農工商務事宜如係民款民辦不沾官帑不與外人交涉儘可不告官府自行辦理卽有公項交涉等款當其試辦之初亦祇稟由該管衙門立案備查俟後成效

昭著再行照章通稟限制利權^紳等此次懇道之稟初不提及借款專利等事固以章程雖出尙須妥議確實方爲定規此時不過酌擬初稿遽行通稟立案將來一不如議不免窒碍滋多是以專請護照免單以符試辦體制合無仰懇俯查上項情形据詳道憲核奪等語伏思該舉人等原議借撥公款現作罷論惟請轉稟憲轅祇給護照免單不沾動官帑亦不與外人交涉似與各省興辦商務民款民辦章程相符可否仰懇憲恩俯如所請先行給予護照免單以利遄行之處出自鈞裁所有遵飭確核据情稟請原由理合稟懇憲台俯賜批核示遵爲此具稟須至稟者

欽加三品銜賞戴花翎四川分巡川東兵備道寶批

此案前据舉人張森楷等來轅呈稟本道以蠶桑本屬大利自宜設法開拓但其所議章程有獨專權利動用公款各節有無流弊窒礙及股本果否實在必須攷較明確當經批飭該牧妥議通稟茲閱來稟仍未將妥協與否及有無流弊各節聲敘卽欲請照出洋并請免單試問主傭二人單身游學不帶貨物何必請此免單護照殊屬含

合川縣志卷二十

蠶業下

五

混仰卽遵照前批再加考核如果實係紳捐紳辦不動公款不專權利以眾人所集之貲財供張孝廉游學之費用卽由該牧取具諸紳連環保結再由該牧加呈印結詳晰具稟來道再行酌核辦理切切此繳
八月二十九日奉到

本州紳糧丁樹誠等陳明實濟協懇備案并批^{年正月}

緣去歲舉人張森楷等協議創辦四川蠶桑公社於來里大河壩經以籌借濟公公舉專職聲明試辦等詞稟請恩廉詳憲立案沐批指出疑難各節并飭^紳等出具連環保結在卷森楷感激奮勵自備資斧親赴鄂浙游歷實於蠶桑利弊確有把握刊爲俗語演說埒粘呈鑒隨卽籌措巨金延訂中國教習三人購買學館蠶種百張浙湖桑秧萬餘株東洋儀鏡鐘表九十餘件中外圖畫書籍二百餘種應給川資價值運力等費陸續墊付交清竝與陸純伯親察訂約合辦縑絲機廠承認買繭資本及租地築竈等事均准予二月內先後來川開辦不日卽有頭批運船至州到日呈請核驗^紳等審悉其事不謬且於各項原估價費摺節十之二三又皆自行籌墊不特不動公款亦竝未動各友股款洵屬

血誠任事見義勇爲惟原議招股銀一萬五千兩今加添一萬兩已覺不敷甚鉅而原領首葉山苞苟輝山又作古人無從追問遂致股款缺濟尤覺著手艱難昨經森楷邀眾公所集議原股諸人均允如數楚繳惟現在桑地社屋家具薪水火食襍用需費不貲非得現成巨款借撥入社暫時接濟萬難藉資周轉因查前州任內批准動用僧心義絕款一項及借撥各鄉積穀餘利一項實係地方閑款確與公款不同其濟倉餘銀一千六百兩零經憲批令穀價平時買穀存倉連年穀昂未買無所用之似亦可暫挪借候還然稟上有案之件可否准予撥動出自恩裁分別飭令該社另結具領決非^紳等所敢干瀆而公社實在必辦亟須接濟委無招搖撞騙別項情弊^紳等甘願出結保明備案且去冬由恩稟憲頒到蠶桑萃編一書發局飭紳廣爲紬繹開導茲該舉集股開社事同一體但事體甚鉅非得恩廉多方督勸難期速成理合將森楷自行購備諸件與借資公款暫作周轉情形協轅陳明作主竝附後結狀一紙存查將來富被全川利及百世胥由恩賜伏乞

批据稟現辦公社情形已悉該舉人張森楷自備資斧游歷各省攷

究新法并措款購桑製具延訂教習洵屬有志之士其中利弊自己確有把握將見風氣日開獲利無窮僧心義絕款既屬絕業自可撥借入社應飭經手之人如數兌付補具繳領備案濟倉存款業經前州批明穀賤卽須買還一經挪借歸款需時去秋州境歉收現復春乾少雨設使青黃不接必須以之辦賑此款仍難准撥積穀倉利歸入學費能否暫挪應俟賑糶竣事自向老首籌商辦理如果眾議翕然本州亦毫無成見也說結閱附

四川蠶桑公社推廣集股白話說明

我們川省自上古時蠶叢氏開基便有蠶桑實爲蠶桑祖國先年絲業暢旺一年能出價值銀一二千萬兩數年來稅務司海關冊報開載川省每年出口絲價值銀四五百萬兩合計本地自銷不過值銀一千萬兩比前少了許多是何緣故一由桑樹多蟲蠶種多病收成不旺得利無幾人多歇業一由桑葉不佳繅車不好出絲糙劣粗細不勻以故上海絲市係蘇浙機廠絲值價七百二三十兩係四川絲值價三百四五十兩不等非是他們欺生實因川絲色澤身分遠不能如蘇浙故也然而

蘇浙之人猶以東洋日本近年於其國中偏設蠶桑學堂講習新法多得絲繭直將中國出洋絲貿奪去一半尚在日進不已勢甚岌岌我川絲尙在蘇浙之下若不設學講求將來桑蟲愈多蠶病愈甚絲業愈衰必致民窮財盡有不堪設想者是以某等集議勸立此社卽由森楷親赴湖北浙江等省游歷攷究得晤蠶桑名士稽慕陶丁仲孚等往返熟議以爲本省舊有桑種蠶種均須另行更換又須講究駢蟲免病製種繅絲之法方能全收利益但其社地家具儀鏡機器等費教習學生執事等用開銷甚多今祇招股集貲民款民辦不能如各省公學撥有藩庫官款辦理裕如可以從事蠶桑學理入門優游漸進則宜仿照外國公程式專講蠶桑實習經濟二科藉獲贏餘速效以保股本而開風氣因議繅絲一項已經森楷與陸純伯觀察訂約別辦應行除開不計合先勸立公社一所定桑地五十畝造蠶室三十間埭講舍住屋三十餘間購家具儀鏡全副延教習三人派執事夫役十餘人收攷額內學理學生十人實習學生二十人實習粗工二十人額外學生粗工不拘人數約計頭年試辦需銀九千八百兩二三年學習須銀一萬兩零合共

銀二萬兩週年八釐行息前後三年須銀四千八百兩應集股銀二萬五千兩訂領首二十五人每領首約股友十人每股友出銀一百兩預先言明此三年中所收股銀如數鋪墊至盡初無紅息可分只能照給官息以保股友月息必待至第四年實驗之期由眾領首各立分社一所應用社地家具等項自量地方情形斟酌預備屆時召回公社卒業學生充當分社教習仍依公社章程勒限每教習一人監督學工十人種桑二千株養蠶蟻五兩收繭四十萬箇製種五六萬圈得絲棉若干斤又夏蠶繭若干兩通可售錢七百餘串用教習二人者倍之三人者又倍之開除月息歲費足保餘紅五分分社自操紅息之券而公社原聘教習期滿辭退新收二期學工應有教習卽以本社卒業高等學生補充給予薪水無多社中先種桑秧又已成林可採無庸出錢買葉成本較前爲輕其各分社來社請驗種例抽該種十分之一入社進款較前爲大除各社中月息正用及提獎花紅外自應剩有紅息按年照股攤分不得含混以昭公道森楷審察其言不謬當允如數招股隨卽在外挪借巨金購買桑秧蠶種儀鏡各件延請教習三人各給川資運力

等費約□本年二月間陸續來川尅期開社所有原先指定設立公社大河壩地方昨已與易君靄如香墀等訂定買地造屋一切應用襍事月內即可就緒惟去歲原集股銀一萬五千兩今驟加一萬兩不敷甚巨擬仍呈懇州官請借李前州任內批准暫行撥用之地方公事閒款二項未識如何萬一不盡可靠須更推廣集股以足成本雖刊刻章程分散股友猶恐新來各友及社外諸君未能審知原委特用俗語演說隨處張貼俾人一見能解庶幾有所興起云時光緒二十八年續元夜燈下四川蠶桑公社社長張森楷啟

社長張森楷上督憲錫蠶社事宜條陳六款

二十八年十二月

一增廓規模外洋蠶桑公社皆有桑田數百畝桑株十餘萬公社無此魄力而議領首一人承立分社一處各栽桑二千株卽是化整爲散之意今查川省州縣百四十餘人股領首之人不及其十之一又以繳股不足領桑立社尤屬寥寥合無仰懇憲天府查中外情事札飭各道轉行府廳州縣均仿本社辦法各立公社一所以期聲應氣求無遠弗屆如或財力不及難以特立公社儘可通力合作各就地地方情形籌集公私款項照章於本年內繳銀一千兩入社保送學生二人往學陸續領回新法桑秧二千株覓地自種或就官荒閒地借撥租種以立異日分社基礎卽廓此日公社規模且使學生學成除由專門學科升進外仍有有自見處所不致屠龍之技無所用之此最通塞關鍵萬乞賞查飭行如須章程演說隨札分致謹候示下數目立遵印送

一預備用具 章程自儀鏡外原議竹木鐵器自在州屬製造本年春中開社□辦不齊諸仍舊貫唯以土法縑車出絲過粗斷不合用改依浙湖常法給圖命匠仿製十工乃成一部其蠶網三千張製種鉛圈十五萬箇爲數過鉅仿造特艱敷衍苟完僅足將事因思將來分社成立用具尤多不先預備齊全萬難取辦倉猝議仿京師勸工廠天津救濟工藝會意招合各項匠徒長年在社製造藉備本社分社各鄉戶購用雖以廉價發售要必歸還工本而可收教窮黎稍補閭閻生計一舉而兩善者也

一廣募生徒 章程額定學理實習學生粗工共五十人由各領首保送非此則爲額外學工不拘人數今秋開辦學理期課已出簡章招攷

學生如額明年正月二十五日應開實習課現擬除本社外添立江北資州公社分局各一所各收學生粗工二十人請分教習前往教授至夏蠶畢而歸所有附近公社及公社分局各州縣有志蠶桑之家俱准照章送其子弟來學以開風氣如能覓取領首作保仍列正額之數不相岐視竝懇憲札敘入此節用廣招徠

一謹製子種 蠶法改良由子種起點子種一差後遂無下手處而製種之法唯資儀鏡實測決非徒手所能奏功若不力從謹嚴明定限制任其依稀仿造必至謬種流傳不特有損公社聲名直是貽害地方永無改良之望關係甚非淺鮮應懇賞查章程辦事第十條利權第四十四一四十二四十三等條准自刊刻圖記呈驗立案蓋用如未蓋用圖記或係描摹影射即是妄傳害種許其隨在拏獲稟官立予懲究卽呈四川蠶桑公社正文六字業肇蜚叢隸文四字圖記各一方是否可用叩乞驗明批示以昭信守

一聯合絲廠 絲廠條約原係公社與陸樹藩觀察出名訂定而章程利權第十條則稱另詳夥辦繭絲專章意以絲廠體大公社雖相招攬仍須更得大力者負之趨也然川中風氣未開人情渙散若不就此成緒聯合公司而更別立主名深恐難觀後效擬懇憲恩賞准卽用蠶桑股票招友入貲一切字號圖記俱依原式以期聯絡一氣不致辦理參差惟別議立股簿不相含混竝於股票內加蓋與爲繭絲四字引首圖記及繭絲專章應俟陸觀察來川開辦時一同呈驗立案

一請指撥常款 公社民股不齊財力單薄請撥地方公款接濟又被提作他項要需雖就各局通融爲數究屬有限竝且眈眈而視豈能源源而來進款不常根基莫立始查前督岑奏札發學堂籌經費表劃分提撥徵捐追繳三款內列迎會演戲寺廟產業各項陋規及捕費練費濟穀育嬰養濟學田賓興竝酒捐煙捐斗捐房捐地畝捐牲畜捐等條又別專札指戶糧等房稅契陋規一條均未稟覆詳奪竊查州中情形尙非十分貧瘠必令遵照奉札逐款辦到得人而理亦不甚難特學田賓興牽涉太眾捕練各費獲數無多酒捐房捐地畝等捐近處通未辦過發難殊不容易獨稅契陋規一項上不在官下不在民確係無名中飽如蒙指撥入社以作常年經費必能有益于事無損于人或慮衰旺

不齊且須量留數成以資辦公費用則懇俯查前列各項賞札飭州照提一二有著之款貼補接濟期令足敷別冊所上豫算常年經費爲度可遂定立永遠不拔之基卽爲風示將來推廣之地仍懇于定案後札飭通省照辦并照提撥此款作爲仿立蠶桑分社專項尤爲傳利無窮不但一家一路之比而已此爲蠶社根本萬望 憲天留意

社長張森楷援案請撥懇飭給領案并批

二十九年九月

緣舉等勸辦蠶桑公社迭經紳糧丁樹誠周瑞祥等協請公款接濟先後批准給領造冊報銷在卷今正舉以預算經費稟案沐批該紳會試歸來再爲酌核示遵^舉旋赴京陳明管學大臣准以民立中學堂咨行督憲飭查推廣應候札飭辦理曷瀆唯社中經費今春存銀不及十兩早已借貸從事現在負欠教習束脩銀五百兩餘外欠零債銀一百餘兩錢一百串前今兩月課獎及後十冬腊月火食脩獎零用等費應需銀五百餘兩合計共需銀一千一二百兩股友應支官息外借索償本利尙不在內^舉等竭力籌畫殊覺望梅止渴難以空言從事唯有懇恩廉賞查原案諭飭該管津捐息穀首事照數劃撥給領以濟要需抑或酌撥多半俟憲札定案再予全撥之處出自恩裁公便沾感伏乞

合川縣志卷二十

蠶業下

十

批公社需款甚急自係實在情形候飭各局紳公同籌議暫行撥給公款銀二三百兩用資接濟至於日後應再行維持整頓之處仰候督部堂札飭至日再行遵辦可也

總督部堂錫札飭合州知州照呈社章絲繭蠶種式樣案

二十九年九月

照得蠶桑爲自然之利川省各屬機織甚繁而種桑養蠶尙未得有善法亟宜乘時振興以厚民生茲聞該州舉人張森楷曾在浙江攷求中西各法聘有教習回籍倡立公社頗著成效竝定有社課章程如能興利便民應卽設法推廣合行札飭爲此札仰該州遵照傳知該舉人將章程及絲繭蠶種各式樣送交該州專差齎送來省以憑核驗竝將該舉人在州倡辦實在情形詳晰稟覆均毋違延切切此札

社長張森楷遵繳陳明條懇詳覆案

二十九年十月

緣舉等昨蒙傳知現奉督憲專札以舉等所辦公社如果興利便民亟應設法推廣飭令^舉等將社中章程及絲繭蠶種各式樣送州專差齎呈到省以憑核驗竝將^舉等在州倡辦實在情形詳晰稟覆等因^舉等

遵卽繳呈重印章程一千五百本新照影相蠶社桑園禮室內容用具
儀器師生圖五片絲樣四匣繭樣二匣種樣四組共一箱桑樣兩種共
二套抄錄教習已授講義七部共十八本學生月課期課題目名次分
數一冊本年飼育春夏蠶成績表式一紙股票一聯合約三分印式三
方招攷廣告一篇推廣集股俗語演說一通條陳清摺一扣外坵繳管
理學務大臣咨文一件所有昔今辦理情形詳具清摺演說暨咨文所
錄原稟竝^舉前後稟州各詞中懇照摘錄詳覆備案惟設法推廣一層
細繹憲意蓋謂^舉等公社實已確能自立有基無壞應予推廣他處以
期善與人同而舉等公社各領首股友繳款無多前經稟請簽催曾未
絲毫補繳不值再與訟爭歷稟前州批准指撥積穀倉利及濟倉溢額
穀銀入社之案又被提作小學堂及賑水災之用亦難援照固請本年
社中經費自春至秋開銷二三千金俱^舉森楷一人出名借貸現在需
用亟急羅掘俱窮大有朝不保夕之勢雖沐批令公局商撥二三百金
亦覺慰情勝無但止暫濟燃眉無甚益於全體必須籌得大宗巨款乃
能挈綱提領原始要終不至廢墜半途有辜上憲飭查之心且負恩廉

維持之意但今時勢艱難督憲憂國憂民萬事待理合援民間學社經
費不足由官籌款貼補之文請照湖北農學堂浙江蠶學館例發帑接
辦竊念庫儲奇絀未必適有閒款可支或別仰累他籌又慮幾務殷繁
應接未遑不無鞭長莫及之慮唯有自就地方情形籌出的款上請查
照立案較爲簡易可行不至空言無實第查州中各局現在實無成數
餘款可籌祇前署督憲岑札知憲行案內有提各州縣戶糧房吏私分
稅契陋規歸入學堂一條未經稟覆詳奪查本州小學堂現未開辦經
費亦饒無須添入此款而公社奉到咨文內引欽定章程指明民立中
學堂資格不在官立小學堂下應與官立者一律辦理竝由官方代爲
保護又謂公社頗得專門實習之意將來升入本省坵設之高等專門
實業學堂一律登進則本公社似已具有中學堂資格亟應遵照辦理
以副憲札推廣之恩查本州稅契四釐由恩收解之外尙餘一分向爲戶
糧倉吏及署內丁僕竝差役等巧立中稅報號名目朋串瓜分盡肥私
囊或供淫賭浪費曾未略出毫釐裨益地方公善確係無名陋規可以
盡數提入公社藉立不拔之基遂成可久之業有益於下無損於上爲

計之便無逾此者理合粘附條陳請予加看轉詳及時定案開支公便沾感伏乞

批該紳等勸辦蠶桑公社初意原係民款民辦乃不待股本收齊輒行招攷實習以致經費不繼拮据頻聞稟情形殊堪慨嘆唯今之計若不助以公款則不特已集之股本永無還期且立見功敗於垂成亦覺可惜然公款者公家之款公眾之財也非奉明文即可任意作該公社用也自今以後惟有遵照前督憲岑奏定原案稟請酌提戶糧兩房稅契釐頭永遠作為州屬小學堂常年經費一面詳查該社每一年內實在需銀若干方敷分布然後札飭學堂首事勉強騰挪按年湊給該公社股本銀若干每銀一百兩仍填股票一張交由學堂首事收執仍依演說內載三年以前周年八釐行息三年以後按年分給五分紅息以作多收學生一班之用如此通融辦理方與該紳等挽回利源之本意相符否則公款先虧利於何有乎此本州維持保護之辦法也至於日後應行損益之處容再因時制宜相機妥辦至据粘呈條陳及呈驗各色程式仰候通稟賚請督藩各憲察

驗批示至日承行傳諭知之可也

社長張森楷遵陳實需繳懇撥濟案

二十九年十一月

緣舉等昨以遵繳陳明等事詞稟案沐批准照前督憲岑奏定原案稟請酌提戶糧兩房稅契釐頭一面詳查公社每年內實在需銀若干方敷分布然後札飭學堂首事湊給公社股本銀若干每銀一百兩仍填股票一張交由學堂首事收執至於日後應用損益之處容再因時制宜相機妥辦仰見公私兼顧前後通籌慎重周詳莫名欽感謹即遵將公社前後用款逐一查核除去光緒二十七年刊章立案招股遊學延師置器買桑購種二十八年修造房屋製備家具試辦實習開講學理等事所用紙張夫馬酒水工料價值脩俸課獎火食零用各費業已報銷本年辦過學理實習兩期用費逐具月結現照彙錄明年續辦諸事別造預算清冊坵請鑒定外現在應補總教習一人未去之前五箇月薪水銀一百五十兩分教習現二人尙存之八箇半月薪水銀三百三十兩桑師一人未收之連年薪水銀七十兩學生十一人執事夫役九人以後兩月之課獎工食銀二百兩共七百五十兩又應定買明年桑

葉銀六百餘兩皆係目前必要之需稍一猶豫失時卽當取辦倉猝所費不啻倍蓰且恐緩不濟用或致蟲蠹損壞等弊而刻下常款未定籌措無方惟有遵繳股票二十張請恩查照填發飭該局士如數提撥接濟眉急竝備明春開社等用俟候上憲批回定案指有常款足敷歲費自不動輒呼籲丐貸頻仍至於州中稅契陋規本不僅止房書獨佔卽以房書而論尙有倉房典吏與戶糧房勻算均分前督憲札僅指戶糧不及倉房自係各地情形不同未暇燭照數計非有愛于倉吏特與格外從優^舉等昨稟全請此陋規撥濟公社亦非故欲腴削若輩不留餘地處人特以公社雖係民款民辦旣已奉到大部咨行准作民立中學堂又奉督憲札飭有應設法推廣明文自合仰體上意按照原定章程盡量辦理以爲通省蠶學觀法所在卽爲異日農學托始攸基不得復如去今兩年牽蘿補茅捉襟見肘情形大爲事外所嗤幾遺局中之累以故預算單中開有本屆教習期滿更出加倍重脩指請能教普通化算學及外國文字語言者一人爲總教習一人爲分教習別添本社卒業生四人爲幫教習兼辦試驗以符中學堂體制以備升進高等學堂資

格又有添造房室備制家具等事疑若規爲過大志願良賒實則依照原章曾未少溢銖黍且皆養蠶種桑開拓利源減輕成本至計斷難隨意核減可以苟且因循必得進款大宗乃能尅期收效是以前稟及坭繳條陳云云確以年來無米而炊困難莫狀萬不得已始出於斯果如恩批因時相機之言得有通融辦理之法能使公社基本永定出產自豐應得利息紅息按章照付若但酌撥戶糧倉吏稅契釐頭交由學堂首事湊給竊恐些須小數不敷開支展轉虧挪利於何有操券以責安所取償不特有乖恩廉調護之心亦非^舉等倡辦之意爲此再四思維欲得社用有資仍於批語不悖竊查前督憲札發學堂籌經費表綴說劃分提撥徵捐追繳三款所列門目可從尙多爰於另稟通籌學務詞中合併彙請通詳立案誠得芻蕘見採必可庚癸不呼否則行潦無源涸可立待嘑號攪擾終古不休人固惡其無厭我亦覺其難忍甚至公利無效私累益深雖犧牲其身家轉荆棘乎學界自屬^舉等之罪或亦當道之羞度以勸學爲心決不坐令至此過慮所及輒盡言之坭上公社來年^{活額}支經費預算表竝儀器名品簿各一册叩請鑒政卽飭補入

詳覆督憲案內併繳公便沾感伏乞

批仰候据情詳稟督憲批示至日再行傳諭知之清冊存核股票發還

督憲札飭催賚繳各件案二十九年十一月

爲專札嚴催事照得本署部堂前因訪聞該州舉人張森楷曾往江浙攷求中西蠶桑各法聘有教習回籍倡立公社頗著成效竝定有社課章程札飭該州遵照傳知該舉人將章程及絲繭蠶種各式樣送交該州專差賚送來省以憑核驗竝將該舉人在州倡辦是否獲有成效實在情形詳晰稟覆迄今一月有餘未据稟覆前來實屬疲緩合行催札到該州速卽遵照前札事理文到卽行稟覆毋再擱延干咎切切特札合州遵詳賚繳社章樣件案二十九年十二月

署重慶府合州爲詳覆事竊查本年十月間案奉 憲札訪聞卑州舉人張森楷曾往江浙攷求中西蠶桑各法聘有教習回籍倡立公社頗著成效竝定有社課章程及絲繭蠶種各式樣賚送 憲轅以憑核驗并將該舉人在州倡辦是否獲有□□實在情形詳晰具覆等事因奉

合川縣志卷二十蠶業下

十四

此遵查卑州舉人張森楷前數年□攷查川省利源首在絲業絲業一旺百貨皆通歲入旣豐辦事自易乃查海關貿易總冊昔年川絲歲可售銀一千數百萬兩今則約減一半之多似此江河日下困伊胡底因而親赴蘇浙江鄂等省悉心攷究始知川省桑性不佳繅車不巧蠶種多病出絲不勻江蘇土法絲每百斤可售銀五百二三十兩川絲止管三百餘兩甚且賤至二百五六十兩所以然者一得法一不得法也迨回原籍卽仿蘇浙速立蠶學館之意勅立蠶桑公社招集股本刊定章程延請教習招攷學生購置儀鏡蠶種桑秧開辦實習期課去年春夏飼養之蠶較之他處收成其繭重加一倍多加二倍好加三倍若能人人仿辦誠屬美利無窮惜乎川人性情大都欲速見小囚見該公社出產雖佳成本較重約計三年之內股款難望歸還遂疑此事迂闊寡效井前之認集股本千金者後只交銀二百金塞責於是經費不濟拮据頻聞上年夏間曾經前署州李牧端概代理州張牧允武許在州積穀倉自項下歲提數百石以爲之助迨至卑 戕到任適奉催辦學堂之文又經州屬紳糧請將上項息穀提作學堂經費其議遂寢該舉人自知款不接

濟深恐蠶業中輟爰於今年親赴京師稟蒙管學大臣按照 欽定章程准作民立中學堂咨請 憲台飭查推廣 奏咨立案并飭州保護推廣等因該舉人現因公社事允兼充^卑州小學堂總理未能親身賚投正欲^{卑職}代爲呈 鑒適奉 飭查調驗之文^{卑職}覆查蠶桑之利盡人皆知但非設學講求不免得失參半鄉里無所歸咎輒謂運氣使然往往棄蠶伐桑不復究心改善^卑州大河壩一帶向係絲業銷場近來售銷價值歲僅二三萬兩皆由民間不知蠶學以致日見減色通省絲貿之衰或亦大率似此該舉自充該社社長以來慘淡經營不遺餘力實能講求新法開拓利源頗得專門實業之意祇以款項不充學生過少一時未見速效風氣尙難開通若不由官維持立見功敗垂成將使熱心興學者皆各引以爲戒必致大生學界之阻礙不特其已集之股本永無還期僅爲該舉人身家之累而已此^{卑職}平日攷察之實在情形也迨奉憲札傳諭復据該舉人聲稱方今時局艱難川省宜爲國家外府近年捐輸已極竭蹶他日供億詎易支持惟有仰懇 憲台將其蠶桑公社准作民立實業中學堂一切規模體制俱與官立中學堂一律辦理以先樹之風聲一面 通飭本省各廳州縣各就地方情形仿辦公社或但任立分社皆與該公社一氣貫注通力合作將來裨學大明不難與蘇浙之絲爭勝競美且將推廣農工商學以立本富基礎是亦國民自盡義務之一道也現在維持之法首在籌款接濟据其豫算表列尙不敷銀一萬五千餘兩倘蒙 憲台允爲 奏咨立案并将章程徧行札發一律仿行當由^{卑職}督飭學堂首事在於現籌學費及提取戶糧房稅契釐頭項下陸續借給該公社銀一萬餘兩仍飭該舉人查照原議每銀一百兩書立股票一張交與學堂首事收存一俟成效大著之時仍卽加息付還庶於公社有益於學費無損一面承由^{卑職}勸諭原認股本之人陸續量力補交以輔官力之不足茲据該舉人呈驗各件除將試驗成績簿一冊延教習合同一紙遵用二紙騰清以歸劃一外其有不便另清不便歸擋各件可否於查驗後發交首縣專差賞還之處伏候 衡奪所有遵 札查覆緣由是否有當理合具文詳請 憲台俯賜察核批示飭遵爲此備由另文呈乞 照驗施行須至詳者

計呈公社辦法摺一扣 預算明年經費表一通 絲樣一匣
繭樣二匣 種樣四組 桑樣二色 影鏡五片 儀器簿一本
講義九卷 試驗成蹟簿一冊 附教習合同二紙印式三方
招攷簡章俗語演說 股票共一冊 重訂章程一千五百部
附繳咨文一角

總辦川東商務錢法局

奏調山西補用府正堂周
暫署四川重慶府正堂張

合州通稟四川蠶桑

辦法案批

二十九年
十二月

來牘敬悉蠶桑爲自然之利川人聰敏提倡如果得法不難與江浙
爭勝今該舉人張森楷勸立公社招集股本延請教習定章開辦已
收實效殊堪欽嘉又得賢有司維持接濟可期逐漸振興富教昌明
拭目以俟既据通稟希候各大憲批示此覆

四川分巡川東兵備道賀批

光緒二十九年
十二月

查蠶桑本爲民間自然之利該舉人張森楷倡辦蠶桑公社著有成
效現由該牧籌款接濟以開全省利源實爲立富根本既据逕稟仍
俟 督學 憲暨司局批示飭遵繳

合川縣志卷二十

蠶業下

十六

重慶府正堂張

批 光緒三十年
正月

既据逕稟仰候 各憲批示繳

按察使司馮

批 三十年
正月

据稟已悉仰候 督學 憲暨 各署局批示繳

辦理四川全省商務總局

批 三十年
正月

蠶桑本理財要政川絲不及蘇浙蓋由蠶學之未精若不亟圖改良
終難操其勝算本總局前赴日本購買繅絲機器回川原期啟發民
智以廣利源該舉人張森楷留心蠶業勸設民立中學堂專門講求
志趣深堪嘉尙茲因股夥昧于遠圖不將股本交足以致公社經費
拮据該州擬提學費契釐以匡不逮竝勸股夥量力補交共襄厥成
辦法甚屬合宜既將章程等項逕行稟賚仰候 督學 憲暨各衙門批
示繳

四川全省提督學院鄭

批 三十年
正月

据稟舉人張森楷倡辦蠶桑公社著有成效擬由該州接濟等情俟
規模已定時自宜與官立中學堂一律辦理以開風氣仍候 督部

堂核示繳

署重慶府張鐸奉勸工局轉憲批令通飭札

三十年七月

光緒三十年六月二十七日奉 通省勸工局 札開案奉

署總督部堂錫 批据合州舉人張森楷等呈稱請以民款試辦蠶桑公社等情一案奉批學務處案呈川蜀蠶桑之利不必弱于江湖等省徒以業是者安常席陋初不知講學求新不惟進步毫無卽舊法亦歸窳敗坐使自然之利日就消滅於商務民生關係兩非淺鮮据詳及呈驗各件該舉人首勸蠶桑專門實業之學倡立公社延師集股小試見功誠由此而擴充自不難操開闢利源之券該舉人不自局於風氣潛處僻地竟能關懷大局籌措及此其識甚卓所辦公社章程物品亦復精良周密苦心實效允堪嘉許惟其款項不及學生過少非官爲提倡保護不足以維成績而樹風聲現在該社急需之款既由該州暫以學費借充所辦情事又經該舉人稟奉學務大臣批准作爲民立實業中學堂由官照章保護并准咨飭查奏咨立案通行自應照辦仰勸工局卽便查照來詳各情及呈驗各件悉心核議飭遵一面通飭各屬立議

合川縣志卷二十 蠶業下

十七

仿辦仍詳細申覆以憑奏咨切切文冊各件竝發咨文原詳仍繳又据辦理合州鹽局補用道向人冠稟親勘公社情形一案奉批据稟該紳張森楷所辦蠶桑公社經該道親勘周諮其於造屋養蠶飼蠶繅絲等事確有師法出絲多而且美高出土貨已有成效可觀惟資本不支經該州陳牧設法攸助幸觀厥成至該社意欲改良子種以濟全川尙應由官保護激勸等語該舉人不自局于風氣因舊謀新講求實在洵屬可嘉川省蠶桑之利不亞江湖若令業是者盡如該社所行其爲益於商務民生自非淺鮮前据該州陳牧來詳及呈驗該社各件業經批行勸工局核飭遵行該道請飭各屬仿立公社分社認銷該社子種等情自係爲推闡利源起見自應照准仍仰勸工局迅卽併案議覆飭遵竝移學務處知照繳各等因奉此查蠶桑爲土貨大宗亟應講求良法以開利源該公社於養桑飼蠶繅絲等事確有師法著行四川蠶桑公社章程除飭該舉人將所出絲本呈驗以憑攷核再行議設學堂分別等第并詳覆督憲外合行札飭爲此札仰該府卽便遵照將所發章程細心校閱庶知程式并轉飭所屬一體遵照仍將奉文擬辦各情形稟覆

備查切切毋違此札計發章程十五本前因奉此合就札行爲此札仰該州卽便遵照辦理仍將奉文日期并擬辦情形逕稟備查毋違此札
總督錫良据詳轉飭札三十年十二月

學務處案呈案据署忠州訓導張森楷詳竊卑職前在本籍合州倡辦四川蠶桑公社已屆三年去歲稟蒙學務大臣批准作爲四川民立實業中學堂并咨請憲台飭查推廣 奏咨立案荷蒙賞飭勸工局通札各屬仿辦一面詳細聲覆以憑 奏咨隨由現署州陳牧以公社改作學堂規模較大經費難濟非協撥公款不能開拓初基詳請在本州現籌學費項下及稅契釐頭舊有規費全數提入學堂陸續接濟原議湊萬餘金藉資周轉仍照社章每銀一百兩發給股票一張日後獲利分紅一切與民股等沐批允准照辦在案伏思卑職一念愚誠當新學厯襍之秋妄思收效農桑爲蜀民根本至計不圖股款弗集負債難勝獲此殊施正如中暍之夫忽逢樾蔭已瘖之馬得近芻豆甚幸甚幸卑職自奉批後卽增築校舍添置器具計今春由陳牧先後籌得公款股銀二千四百兩春夏實習期內所有縑絲製種約獲子利六七百金載決算

表不必聲敘惟本年秋間接辦學理期及明年兩學期銷耗常備各品僅此三千餘金以資周轉不敷之數無論如何節省總在八千金內外卽卑職勦辦之初亦逆知籌辦實業需款至鉅非朝種樹而夕可獲陰故原擬招股銀二萬五千兩作爲試辦三年內資料一俟學生卒業分社遍開以售種改川蠶之良以製絲收外貿之利其時桑可自採師不外求校室已備不必再議增修儀器已全毋庸更謀新製縮一絲之費卽增累黍之高利國利民數可操券此區區之愚豫決之三年後者固不料民股之皆成畫餅也卑職夏間捧檄送攷忠州正值暑假休業滿擬釐頭一項照案全撥則秋間開辦學理卽可增廣又得勸工局札飭之力各屬來社參攷項背相望客舍常滿而井研文生巫朝輔江西職員程啟政以搢紳之子不遠千里來社就業卑職旣感憲台維持之意又深幸風氣之漸開西望鈴轅未知所報乃冬初因奉札赴省供職調查便道回社料理學科始知釐頭一項自詳准立案後尙未奉撥一次以致版築中輟學生減餐大有朝不謀夕之懼卑職不得已親赴州城陳請照撥批再集紳議奪在陳牧之意不厭求詳而學堂需款孔殷卽

便遵批議覆亦恐緩不濟急卑職再四思維此項應提之款經陳牧据情代籲又蒙憲台鑒學堂之無力允如所請自與無著之款不同伏懇憲台援近日學堂民款不足官爲津貼保護之例賞查卑職後列預算表估計實數准在地方賓興各局先行酌撥銀一萬兩俾已立之基礎不致隳於垂成於學界影響關繫似非淺鮮如蒙允准將來歸還的款仍請指定合州常年稅契釐頭一項按年劃還歸數由官經手轉給無論何項要需均不得於此數指撥約計五年即可有贏無絀卑職屆時如數照給股票交學務局首事收存將來憑票分紅以符原議而隆新學實業幸甚學界幸甚再卑職晉省傳聞憲台遵奉欽章有實業高等之設則各州縣中小學堂自必一律檄行卑職之愚以合州現有學堂又經官款入股將來官立一層應懇恩免再事增建且目前各學經費及鐵路股捐在在藉資民力亦應稍留有餘顧全新政是否有當伏乞衡奪所有合州民立實業中學堂決算預算兩表暨部頒綜計表分繕清冊附呈均鑒并乞賞予查照分別奏咨立案實爲公便等情据此當經本督部堂批現值經費支絀之際自應亟予維持以資經久而圖擴充

所陳原稟合州詳准戶房稅釐一項迄今尙未提撥既已緩不濟急請就賓興各局項下撥銀萬兩仍由稅釐收數按年劃還屆時照填股票事關公益應准會同陳署牧就近籌提俾歸實濟竝候行知該署牧知照該學堂辦有成績前既稟奉 學務大臣批准并准咨飭查業經轉飭勸工局查覆相符自應奏咨立案使各州縣知所仿效日後官立農工實業學堂該州可否增設彼時酌量情形再定行止可也繳表册存除批迴外合就札行爲此札仰該牧即便遵照會同該訓導將該學堂議撥款項妥速籌提以濟要需而資保護仍將奉文日期遵辦情形具詳查攷毋違此札 右札署合州知州陳牧夔麟准此

咨呈合州遵照憲札飭局撥款接濟蠶社文

三十一年十二月

署忠州直隸州學正堂張 爲咨呈事光緒三十年十二月十一日奉四川總督部堂 文開學務處按呈據詳該學所辦四川民立實業中學堂現值經費支絀之際自應亟予維持以資經久而圖擴充所陳原稟合州詳准戶房稅釐一項迄今尙未提撥既已緩不濟急請就賓興各局項下撥銀萬兩仍由稅釐收數按年劃還屆時照填股票事關公

益應准會同陳署牧就近籌提俾歸實濟竝候行知該署牧知照該學堂辦有成績前既稟奉 學務大臣批准并准咨飭查業據轉飭勸工局查覆相符自應奏咨立案使各州縣知所仿效日後農工實業學堂該州可否增設彼時酌量情形再定行止可也繳表冊存等因奉此合行移咨爲此咨呈 貴州查明上項事理札飭公正局士當此年終報核之期逐將賓興各局存款幾何核算清楚就本年內外陸續湊提若干歸敝學所辦民立實業中學以應亟需歸時輪派各里局紳入堂經理收支半年一換以杜浮冒侵蝕之弊俟提足一萬兩照案由稅釐項下按數劃還各局用重公款除 憲札行外理合自錄批示具文咨請查照辦理須至咨者

合州札飭學務局照撥公款接濟蠶社文三十一年正月
爲飭札事光緒三十年十二月二十七日奉

總督部堂錫札開爲札飭事學務處案呈據署忠州訓導張森楷詳稱云云具詳查攷勿違此札等因奉此合行札飭爲此札仰學務局紳會同賓興等局首事查明某局款有餘贖暫行借交該局轉付蠶桑公社

合川縣志卷二十蠶業下

二十

以資接濟此項借款將來卽以戶房稅釐分年提還勿得虧及各局之款致使通盤牽動一面仍令該公社按照原議每在該局領銀百兩卽填股票一張存在該局以便將來如數收回作爲擴充學堂之用一面在於五里遴選公正殷實紳糧或一季一換或半年一換前往該公社監管銀錢出入隨時報州查攷一面仍將提借款目遵辦情形具覆核奪以憑轉詳勿違特札 右札學務局紳等准此

四川蠶桑公社社副苟覺民等援請給領案三十一年六月

具呈四川蠶桑公社社副職員苟覺民幹事職員徐澤周會計文童魯沃爲援請給領事緣本社社長張森楷客冬曾將社中去今兩載用費開列決算預算二表詳請督憲籌濟蒙批准在本州賓興各局撥出銀一萬兩由州於稅契釐頭項下按年劃撥歸還專札飭前州陳遵照在卷社長奉知後卽牒請照撥并請派紳隨款到社監視收支以重公事適前州陳交卸恩廉蒞任方始諸務倥偬未及飭辦社長又有別項要公出差忠州不能久候遂自就學務局士曾紀鐘彭樹勳撥銀一千餘兩付交職等供支迄今夏蠶已畢實習期滿頭批學生已屆卒業應給

升送資費應償賒貸本錢應給歷年欠修應支眾股存息約須五千金加以預算表中應支數通共在八千金以上本年社產新絲四千餘兩新種五千餘紙新綿二百餘斤較之往年已多倍蕤然以價值核實不三千金且售種須在深冬能否暢銷殊難預料絲則隨時可賣但已奉有省垣勸工局飭送五千兩之文陸續遣呈一未回信固非虛懸無著要難取濟目前若不及時圖維深恐擠迫倒閉頃社長自忠州便道歸省覩此狀況力任到省催收絲價以應急需第其數不甚多仍囑職等晉州設法籌措職等昨向各局婉商請益均見覆以雖有督札未得恩准明文管契之人依舊照前仍給書役攤分中稅陋規按成俵派至盡刻未餘存絲釐日後從何撥劃徒成畫餅未便實行等語職等知稟承無自難與力爭祇以社用孔殷社長歸期未定理無坐視致成立稿是以具陳理由并援督札定案懇請賞飭該局分別遵照給領將來如何歸還之處容俟社長差竣還州協議定奪公便沾感伏乞

批卷查明前州任內接奉 督憲札文當經轉飭學務遵辦在案茲據稟稱社用孔殷著學務局紳會同賓興等局首事查明各該局有

無餘款公議借撥以資接濟具覆核奪

社長張森楷請改公社爲官辦案

三十九年九月

具呈四川蠶桑公社社長張森楷爲陳懇覆奪事緣職開辦公社於今四年頭班學生已屆畢業昨懇 督憲照章攷試并陳手摺六條蒙批附詳各節均係該公社切要之圖俟委員前往會同合州樓署牧詳查覆奪再爲分別飭知今承委 恩 台雙旌蒞社調查經費點檢器物攷驗學生謹造具經費表一本器用簿一本教習講義八本學生試驗卷九本歷年攷試積分平均表一本賚呈 台轅叩乞逐再詳覆所陳一切是否核實果否成效應否量予保護能否援請奏咨靜候衡裁無庸口贅惟學生畢業一層原係職陳手摺之第一條例分畢業升班兩次攷試曾經面稟 督憲復在學務研究會稟商升藩憲馮准於攷試之後代懇奏咨立案并請商部學務大臣示定升班處所其未升班以前許照省城武備學堂畢業生例先給外獎頂戴以資鼓勵職奉諭後卽在高等學堂胡總理處請得空白證書多紙由教習在社逐日分科試驗照記分數再請委 恩 台覆試內場科學以符定制蒙諭奉委札內初無

攷試畢業明文只可赴社監臨代爲申賚攷卷轉請批評未便填給證書致溢分際自係慎重公事無庸格外多求但公社定章學理期內額定正數十名現在風氣開通來社請學者已逾兩倍猶復源源而來最爲發達氣象若不乘機獎勵似不足作方新之氣而饜夙素之心應宜如何聲明請示辦理之處出自逾格照拂非職所能妄干至于歷年經費原有會計收支專司其事惟職向主眞流水假坐簿之說故于流水簿內散數責令過成年結月結逐年逐月貼示社門俾眾週知別飭照錄手摺存社備查無如二十六年勅議招募二十七年出外游歷前後酒水禮情舟車旅費及購置儀器桑秧延訂教習桑師等用皆職獨力自備或出的名借貸他人未嘗僱傭司帳僅有小冊漫記大致不差細或未盡密合二十八年開社之始卽據報交司事原冊何存了不省憶其年職兼翹秀振東兩鄉校東西奔馳暇時殊少二十九年赴京立案出洋攷查至九月言旋又爲前任陳官照請總理學務尤爲倥偬不遑去年春中署理忠州訓導八月省檄調查冬月晉省報告本年春間又以查學至忠六月銷差新秋回社約計六厯寒暑實未淹住經旬自覺貽誤滋多亟思及時補掾是以八月初旬在社攷查流水結賬始知社中各簿僅能記注由外入社經手支出之數其在外間由職過付巨如脩俸儀器樹料細如工價信腳力錢未經到社報明者司計概不得知無從平空記載或未得職詳告亦多立名錯誤前後不符出入差懸且慙且懼遂以月中進州徧向來往各號清查底帳竝就職舍私簿逐細尋求乃得補闕拾遺粗就端緒飭照錄作經費表冊未竟適值委恩台惠臨查帳職以舊流水新表冊竝年結簿進復諭索取坐簿暨管帳人藉供研究兼謂欲提地方公款理須將帳報明況有多人違言尤應逐款釐覈職知事體固忝然查表冊報銷用銀一萬八千八百餘兩公股止三千五百餘兩餘并由職挪墊或售社中出產及收學生學費而來現雖欠債本股銀九千二百餘兩而有存儲固定流動兩項資本數足相抵除此之外不過用銀八千餘兩猶有教脩獎費葉價蠶用五六千兩在內平均一年火食零用各項僅僅用費五六百兩誠屬省之又省卽不逐查詳細花帳猶應信爲款無虛糜以故辦理多年從無一人訐告獨至今歲謠詠紛起有一事數控一日數控之稟詞復有一人出頭眾

人出頭之攻擊風聲鶴唳草木皆兵固職無德無才經理不善亦或有人主使其際捏砌牽引想在鑒中雖蒙明諭禁止藉神燒香示相調護第念鄉愚迷謬各處打毀學堂之案紛騰報章設竟自居文明不畏強禦飛災橫禍豈能防之一旦孽火燒空不特勞 恩廉勘報之煩亦且負 委台成全之義於人於己兩敗俱傷爲此再四思維情願將本社值銀九千餘兩之現存各款盡數交出請照給予明銀俾職得自償還借債股息不致負責戚友貽累子孫應准免其造冊報銷以歸簡易嗣後由官督辦抑派紳糧接辦或照章與以特別利益抑循例給以股首利息職均無異言如以出入所關萬難模稜遷就則請將職昨呈之舊流水簿加印騎縫發還自覓通曉帳目之人照補歷年缺誤必能絲絲入扣駁詰無虞苟有浮虛自甘坐罪總之公社此日進步極其可喜現情極其可危若非肆應鴻才籌得大宗巨款消弭目前險象竝將積欠清償而徒牽蘿補茅稍施沾潤勢必累上加累竟成外強中乾不啻待哺嬰兒斷乳立可餓殺尙何擴充之有唯查州中人士犧牲其私利以謀公德者現尙無多各局屢經提撥餘款有限倘令地方承辦深恐財力窘困仍向官署呼籲終成永遠之憂竊聞 朝廷振興實業各省承風講求多成蠶桑學堂本省官報亦曾登載藩臬兩憲請立實業中學堂蠶桑總局公牘迄今未見實行人士不勝喁然可否代懇 督憲查照直隸蠶桑立局固安河南蠶桑立局懷慶均在省外之例卽將公社股款借款悉數發還改歸官辦不過費帑一萬八九千金可使全川蒙福本州免累職亦幸得無事一舉三善計無便此其社存蠶種四千張已收存款數內但須全售始可照歸合無報聞督憲略依去年沈觀察示給商標大意申明改種進化之理參仿前浙撫廖侍郎辦法飭令產絲府縣各量地方情事認銷蠶種若干由社備文致送或遣學生偕往教導土絲漸可改善社產亦較增多從此廣布全省利益當復不少或遂節省官款未始非計之得也職爲推利避害保全公益起見是否有當理合具呈請予据覆衡奪須至呈者

批該公社辦理情形具有事實可攷者已經本州委員會同查明得其大概惟用費將近兩萬公款亦三千餘金竝無詳確帳簿殊爲缺點該職請將公社交出又以各局屢經提撥財力窘困倘令地方承接必

仍呼籲無濟詳懇 督憲改歸官辦提帑發還社款且有使全川蒙
福本境免累之語具見善審時勢兼顧大局惟接辦需用鉅帑 督
憲能否允行殊不可知而該職既意欲息肩不妨先訪本地紳衿設
有人能集資承接竟此垂成之功免耗公家之款較爲正辦仰即妥
籌商定以憑据情會詳飭遵切切試卷表簿等件竝候分別存送
社長張森楷賚呈社產物品稟請商部核示案

具呈四川蠶桑公社社長揀選知縣合州舉人張森楷爲陳懇驗收核
示飭遵事竊職頃閱邸抄敬悉 鈞部奏設商品陳列所咨行各省飭
屬照送天然製造等產到所陳列以資攷驗職謹遵陳公社所產框製
春蠶新長新圓諸桂種各一紙繭各一匣夏蠶玉稀諸夏種各一紙繭
各一匣諸繭所縲細絲肥絲各一束綿各一斤所織出緞面甯綢加重
甯綢褂料各一件竝原訂章程十本專使賚呈叩乞 賞查驗收埒各
省品物之末驥尾名彰無勝榮幸如蒙逐加攷核將其優劣各點及應
如何改良之處指示飭遵俾得知所向方漸圖進步尤爲感荷之至抑
職更有請者公社以二十六年十一月勅議二十八年二月開辦二十

九年五月由職赴京請示是時 鈞部尙未設立前蒙學務大臣批准
作爲民立實業中學堂咨行川督飭查推廣奏咨立案 督憲亦獎勵
屢批援案奏咨迄以諸多窒礙未能實行本年六月公社頭班學理實
習學生已屆畢業按章應由監督協同教習攷試照注分數給予證書
再由該管大吏會攷送入應升之學堂試驗合格卽予出身升班確因
實業中學堂尙無奏案職亦未有當監督明文不敢率任攷試權責卽
于晉省報攷成績之便呈請 督憲委員監臨攷試業于八月下旬印
委會同來社面請教習出題攷試各畢業生當堂閱卷注分据得優等
學理生吳德一韓興佐張守銘三人中等學理生唐二潛王道深王道
泰唐二彝湯君弼魯沃六人實習生張家鵬張傳熾二人均暫請照本
省武備學堂去年畢業生例先給外獎頂戴俟奏准定案得有出身後
再給證書現尙未奉批迴不知如何定奪風聞一切實業學堂均已定
隸 鈞部往年學務大臣批准之案應否仍舊兼存或由 鈞部賞予
移查歸併或另咨行川督特別奏咨本社學生是否具有中學堂程度
似應憑其平日講義及其臨時試卷酌量決定將來應否照送講義試

卷到部抑但据教習及大府攷核卽爲定評又本省現無高等實業現在與攷各生果許照章升班究竟在何學堂以及社產絲棉蠶種如何方給商標注册保護統乞逐核批示賞札飭遵或遂奏咨立案實爲德便沾感伏乞

社長張森楷呈請學部查案示遵案并批

三十二年四月

竊職光緒二十八年二月仿照各省振興實業之例在合州本籍創立蠶桑公社開通風氣隨將酌擬章程及辦理情形于二十九年五月上呈學務大臣批准作爲民立實業中學堂咨行四川總督飭查推廣奏咨立案等因職隨卽措資前往日本攷查一切竝購應用儀器回川延師招生廣加研究董理經營瀕及四載去年六月頭班學習實業學生已屆畢業八月呈請督憲委員會同印官來社攷試與所呈課本講義試驗積分之點相符竝周覽桑園房舍儀器器具諸不動產常備品仍調查歷年月結歲結流水帳底社用銀款尙屬確實茲將後開社產蠶種絲繭織成綢緞各物品暨原定章程齊赴呈驗抑有請者本社雖經學務處批准立案而改隸學部之後未有明文將來畢業學生出

合川縣志卷二十 蠶業下

二十五

身升班應由鈞部酌定應請特別奏明立案庶社內人等知所向方力講有用之學又本社開辦之始前署州牧陳夔麒會同按照原議章程預算四年經費需銀二萬五千兩通稟督藩大憲先在賓興各局提撥銀一萬兩由州每年于本署書役門簽所佔之中稅釐頭項下劃撥歸還批准飭知在案計今四年社用實付去銀一萬七千八百餘兩除陳牧入股銀二百兩職自出銀一千兩前後收過外間公私股款銀八千二百兩陸續支用外其餘皆係職自行挪墊前所稟准指撥之款自陳牧去任後竝未動撥社中經費大有累墊不支之勢伏讀本年初一日上諭暨鈞部原奏講求農工商各科實業以尙實爲宗旨本社辦理蠶桑正復相合刻已漸著成效遵當力圖精進應請咨行四川總督飭下該管地方官查照前此批准原案按年撥濟切實保護庶免垂成中輟再本社開辦在先商部尙無底案擬請移咨商部一律立案竝將呈驗社產各物品附入陳列所以資攷核實爲公便所有創辦社學漸著成效竝呈驗社產章程懇請奏明立案飭下保護緣由合此具呈伏乞學部批

据稟已悉該社所呈社產均屬優良足徵該舉人任事實心辦有成效各物均已咨送商部附入陳列所以資攷核將來學生出身應由四川學務官攷驗後酌給文憑以示獎勵所請由地方官接濟俟咨行四川總督飭下合州查案辦理惟懇請奏明立案一節查二十九年該舉人創辦之始曾具呈京師大學堂經管學大臣咨行四川總督飭查推廣奏咨立案此次應由川督查明奏請已黏鈔原案分咨矣原章程存查此批

社長張森楷呈請商部立案案

三十二年四月

緣職光緒二十八年二月爲開通風氣在合州本籍創立蠶桑公社二十九年五月隨將酌擬章程及開辦情形呈明京師學務處蒙學務大臣批准作爲民立實業中學堂并咨行川督飭查奏咨立案在案維時風氣未開籌款不易職首先出股銀一千兩署州牧陳夔麒出股銀二百兩前後外招股銀八千兩以作社中聘請教習購置儀器建造房舍桑園以及職遊歷東瀛攷查蠶桑川資等費第開辦之初在在需款陳署牧維持學界具有熱忱職以本地公事餘款呈請撥濟該州卽据呈

通詳督藩大憲先在賓興各局提銀一萬兩以州署門丁書役所占中稅釐頭款項劃撥歸還蒙川督批准撥用竝飭作爲入社股銀計今四年實付去銀一萬七千八百餘兩去年六月頭班學理實業學生已屆畢業祇以省垣尙未設立實業高等學堂稟請督憲委員會同本印官攷試竝呈課本試驗積分之點察核相符至歷年流水底帳一切用款以及房舍桑園諸不動常備品值均經查明實報實銷除榜示各屬學生名次外已擬請川督暫照本省武備學生去年畢業成例先給外獎頂戴俟奏咨學部得有出身再給文憑本年學部已奉 旨成立特專將學社章程社產物品彙存學部竝懇將產品送交鈞部附入各省市物之未附驥益彰無勝榮幸此職創辦本州蠶桑實業年來之實在情形也切思職數年以來時時以風氣爲心培成桑種送人樹藝試驗蠶種送人養飼猶復募人四出逢場演說蠶桑之利土法之害逢人輒送蠶種一紙尙恐不足以招致之也又復購置電光養蠶影本招人聚觀以便擴其聞見幾於手据口瘖奈全川地處邊鄙人安故習事屬創辦觀望滋多小民之觀聽專視朝廷爲轉移雖迭經 諭旨通令自闢利

源鈞部竭力推崇實業而文告所及草野未週知之陳牧去後州中批准之款迄無著落小民無知幾視實業爲無足輕重之舉不特職已成之社固屬可危而川中未闢之利影響尤大伏讀本年二月二十二日諭旨湖南紳士創辦明德實業學堂蒙鈞部代奏請立案天語褒獎薄海同欽職辦理蠶桑與湖南事同一律可否援照明德學堂成例代爲奏明立案竝飭本省按照原案護助之處恭候鈞裁至齎呈社產物品蠶種有無病毒試驗是否合宜繅絲之法如何改良組織之料若何進步其中相差之點甚多尙未蒙明白指誨均祈一一示知所有創辦蠶桑實業中學堂卒業援懇奏明立案以資提倡而闢利源各緣由理合呈明伏乞

社長張森楷呈請學部查照奏案并批

三十一年四月

竊職于光緒二十九年五月以辦理公社情節陳明鈞憲蒙批准作民立實業中學堂咨行四川總督飭查推廣奏咨立案職隨措資前往日本調查一切並購應用理化器械回川至九月底到州已蒙督憲准咨札州查覆前署州陳牧夔麒以職原議章程預算四年經費須費銀二

合川縣志卷二十

蠶業下

二十七

萬五千兩現祇職自出股銀一千兩外股銀二千九百兩勸各局湊公股銀一千六百兩諭僧皆著捐私股銀一千兩提僧先萬賣業銀三百兩通前共得銀七千九百兩所欠猶多更議以戶糧倉房門簽差役所分佔之中稅陋規名稅契釐頭每契價一兩得銀一分及州賓興等局年存餘款約共合銀一萬餘兩撥歸公社隨時取濟通稟府道藩督各憲存查示遵尋奉督憲批准先在合州賓興各局撥銀一萬兩由州于稅契釐頭頂下按年劃撥歸還仍照民股之例每銀一百兩給股票一張用符原議飭州尅日詳覆以便援案奏咨分別札飭職知照陳牧于奉到後續更撥三費局銀六百兩鹽課局銀四百兩學務局銀三百兩暫濟急需餘俟後議陳牧隨卽交卸樓牧藜然接署職据督憲批札請撥各局襍款及稅契釐頭專款荅以局款應須查覆稅契釐頭祇房書所佔係屬奏案當予飭遵門簽雖已奉裁而例設收發員代司其事當享其利礙難動輒議撥職知難與深論姑請量留數成酌撥數成入社示相兼顧殊以未滿其意三呈不報并賓興各局款亦不議提職無如何延今六月本年實習期畢頭班學生已屆卒業職因晉省報告成績

請員監臨攷試之便埶具報銷表冊開載四年社用實付去銀一萬七千八百餘兩除前後收過外間公私股款共銀八千二百兩外餘皆職自設法挪墊及售社產絲棉蠶種或收學生脩費而來薪勞因未一支逋負尤爲積累無台避債何計回春特請遴委幹員兼查社中用項是否應予撥濟亦便屆滿報銷八月委員至州會同樓牧到社調查歷年月結歲結流水底帳以及桑園房舍儀器器具諸不動產尙與報冊所列常備品值銀九千餘兩之數相符隨由教習出題面試諸畢業生交到各卷亦與所呈課本講義試驗積分之點不相刺謬委員因謂學有實效應宜遵札撥款極力維持樓牧顧不謂然且有別項違言委員慮致抵牾卽以會詳主稿專屬樓牧而去會奉督憲通札以職朞辦著效特記大功二次飭司注冊行知別札飭查賓興局款不准妄挪他用樓牧無可爲計乃借設法籌濟爲詞延不詳覆經職四以陳懇詳奪懇飭接濟苦累不支指款濟急等詞陸續催詢迄逾十旬猶以空言搪塞且乘鄉愚控爭神會之罅批將早經施入公社已歷二年之垣城山田業飭令退還又無故冤誣職貿官平錢舖學徒唐思敏平有錯誤捕笞數

千枷號門首以示挫辱而洩忿懷職覺橫逆不情難可與居朝夕卽自邀集股友願甘辭退免灾股友戴蕃皋等懇語堅留竝將前後情形逕陳督憲請示現在尙未批發不知准駁如何或以樓牧聲氣廣通兼係歷年大幕非得排闥上訴難期公道爲昭責職義無旁觀竟同束手特自思維居邦不非聖言誠是但方議行憲政事皆公理爲衡不容官權自專尤禁奴隸受制況有大局關係豈能不與競爭是以匍匐歸誠瀝將樓牧因護中稅之私刻意破壞職社旣旁敲側擊以起其風潮更拔本塞源而絕其命脈甚至串誣陷害無所不爲非有大力維持必將旦夕傾覆謹援前准之案懇奏保護俾得款有接濟不至動爲風雨漂搖蠶業前途有濟職深幸甚

一件四川蠶桑公社社長合州舉人張森楷等稟請立案批該舉人等創設蠶桑公社据陳現辦各事意在開拓利源講求實業洵屬可嘉應准如稟存案惟卒業學生須俟本省官學堂設有農學專科方能攷驗仍候行知川督轉飭該管地方官詳察情形逐漸推廣再行稟請奏咨立案可也章程存

督憲錫電咨學商二部請辦社長舉人張森楷案 三十二年四月

政府公報川報皆登載其全文是以未鈔今覓其底不得大致以該社桑株尙茂蠶種亦佳教習頗優儀器掬具是以疊飭該州籌款接濟不圖該舉人膽大妄爲負此培養武斷鄉曲貪得無厭至一日控案有十數起之多總之此人在學界則蕩軼範圍在商界則違反規律相應咨請查辦云云其文頗長其詞甚苦此缺不載疑于國史諱敗之故智因撮其凡于此有以報底來者仍當照登

四川蠶桑公社宣告困難狀 附公牘彙錄 三十二年六月

敬告者森楷不自揣量謬以人無智愚但略具有知能卽當傾貢于社會以盡國民一分子之義務故于光緒二十六年冬拳匪粗寧國是未定之際遽與井研施燮專太守同里曾雨珊別駕議辦四川蠶桑公社于本州之大河壩場講求新法開濬利益訂立事宜通章利權專章額設學理實習學生粗工共五十名預算初辦四年經費須銀二萬五千兩原擬民股民辦不沾官帑迄二十七年森楷游歷鄂浙等省攷查蠶學辦法就延教習工師擇購桑秧蠶種儀器用銀一千六百餘兩悉由

合川縣志卷二十 蠶業下 二十九

森楷籌措不假公支二十八年春開社應用建築製造脩膳等費在在須款時僅收得股銀二千九百兩不敷甚鉅勢不得已始援民間興學經費不足應求公家貼補之文改請借撥地方公私款項隨時接濟經前署州李子節明府陳衡山司馬陳幼石觀察諸公熱心贊助先後撥出學費賓興等局款僧心義等施款共銀四千餘兩敷衍取給勉強支持二十九年夏詣京管學大臣立案蒙批准作民立實業中學堂咨行川督推廣奏咨森楷隨赴日本參攷并增置理化器械踰秋乃歸明年冬抄結帳實用過銀一萬六千餘兩抵除上列三款暨續招新股歲出社產各款猶欠外債四千餘兩度非森楷棉力能償特請陳公幼石通稟各憲懇先在州各局借銀萬兩由州以奉旨提撥之戶糧倉房陋規奉文裁革之門印簽押中稅統共收銀一分名爲稅契釐頭項下按年劃撥歸還仍照民股之例每銀一百兩給股票一張以符定制當蒙各憲照准并以苦心孤詣開風氣先等語迭次褒嘉並有飭記大功二次之札著有成效之奏載在官報遠近聞風來社請業紛然日眾綜計本州保送外屬自費學生足有一百四十餘名溢出原額一倍有半森楷

慮其程度不一議更添設普通兩等小學堂爲諸生補習預備地兼設簡易蠶室桑土試驗場復繅土絲場蠶具工藝廠爲諸生推廣實行基礎又別自開蠶桑分社女子實習小學校以期人皆執業家無尢閒固不敢以成績自居然而後效可期前途有望雖祇椎輪大路未始非吾蜀實業之先聲也不意自去春初陳公卸任樓強安刺史權篆來州深惡議提稅釐爲侵官界權利遂與公社反對必欲滅此朝食以示拔本塞源數經森楷援案請撥一不批行仍愆無知鄉愚藉端肇事如久提之垣城山業新佃之淨居寺田皆起訟爭不復安靖甚至一事數控一日數驚現象不勝憂危歷來都未曾有森楷詳所由來卽就暑假期內頭班學生畢業照章請官會攷之便面求錫帥委員監臨并查歷年社帳以便報銷交代暫避其鋒錫帥爲委專員兼飭樓官參預樓官初不欲照攷試嗣爲森楷及諸生援据定章固請乃邀教習出題面試一切均能如式樓官見于科學無可指摘則藉帳目刁難以爲日久事繁爬梳不易苟得一二癥垢便成全體瑕疵將予森楷不堪脇使徒手自退森楷心知其意卽照書立議約聽憑官紳接管以後不復預聞而卒不

得其人竟不達其目的因陽協商委員留俟徐議別自誣捏森楷侵欺橫惡等罪密稟錫帥謂非州官權力所制請派道府大員嚴切查辦勒令交替錫帥電飭重慶關道就近查看旋有某紳到社聲言調查學界在社盤桓三日盡廉社中情實以覆社基由此迺定森楷時方奉先慈諱杜門守制未之知也惟覺社用窘急非得二千餘金不資周轉旣久不得代凡以社事請籌者苦無以謝之則雖苦由餘生亦不能不越禮含哀作書告貸以取濟焉私幸早獲替人不致情見勢窮一敗塗地爲嫉我者所快而已延今正月葬虞事畢猶未得有受代消息而社期開始既有歲例常支去秋畢業學生又復催問等第名次森楷自以責無旁貸應與公牘稟詢乃因未蓋學董戳記再爲門丁所卻遂向學署借用印文期得直達樓官輒藉擅用印牒請撥正稅揭稟錫帥請將前准撥銀一萬兩之案註銷仍飭以後不許再向公家求索分文以相遏抑更自于其卸事之前一日飭將森楷向來租買之資斧官平改提歸勸工局爲盡翦枝葉之謀又以調充督轅文案差故求分得農礦股將任舞弄壹是爲所欲爲森楷恐遂被其動搖亟遣人詣學部稟陳辦理情

形竝呈社產各品請其攷核一面自走省垣瀝情求解至乃頗得其前後密構及連橫傾陷狀擬卽逐加辦訴會社員飛函言森楷去後樓官計薦本社總教習祝仲峙君子農政局檄電交馳敦迫令去諸生陡失所望多請還費退學業經權詞安慰須急向局設法挽回或及時還社籌靖風潮否則猝然一決將至不可收拾云云森楷得函惶愕徧詣省友商籌僉言辦理不難自救爲急則日叩謁農局求得兩全淹厯日時迄無成說迺念公社之立備極艱難今方發達有期而顧橫遭劫奪于催青期內有罷學風聞禁之不能解之不得將照賠學費二千餘兩復減收產品一千餘金出入舊新負累過萬固負戚友之疚且遺子孫之憂言念寒心思洒熱血以爲妄謀公益者戒亦使動觸官府者驚此森楷欲爲公社殉身農局之說之所由來也旣而學界同人咸相勸阻農局當事亦許通融因求保護之條如立交涉之約願相埒屬不復抗違立案而歸給札以解風波遂靖基礎轉堅在森楷當之不過無可奈何差幸有此而樓官之意則以爲能消弭無形維持有術非極其所往終歉于厥心于是奇外出奇很之又很乘挾帝令侯之勢極取子毀室之

思于四月間札發合州內開督部堂批一通痛詆公社學生不遺餘力竝有不得混稱學堂及率稱四川蠶桑公社等語全文詳後公牘彙錄中森楷初以其與前後批札奏報及去夏面言不諳蠶學之說不符疑爲吏准官行故事非出督帥本心及見官報刊登始知憲意已惑非復前日主持而農政局亦以此故于所立案批無庸議餘稟直卻不收謂旣貶名稱例不能與本局直接應由合州轉詳州牧桂梓伯刺史則畏大府幕僚無敢少迂于所發札文遵照牌示外遍發告示張貼各鄉場各學堂以助之攻承審蠶桑分社奉提垣城山業爲人翻控一案業經收租二載亦強鎖押當事勒逼退還其他關涉蠶桑之端率多牽義拘文不肯了決森楷懼且因而破壞再請關道遵札覆查冀得和盤托出黑白昭然關道方相慰諭適奉學部堂批盛加獎藉竝許酌給學生出身以資鼓勵覺尙略有三代直道一綫生機但不逕爲奏明止咨川督查案奏咨殊難得其效用且恐從而生忌或不免有咨部銷案等事反覆思惟莫知所措竊聞朝廷建議立憲所有立法行政司法三權皆準法律裁判不復純用專制政體橫任強權抑壓以故新立諸部均許紳

商直接以求民隱上聞學商兩署尤以提倡保護爲事見諸奏牘文報幾于美不勝收則雖一私人一法團之微苟爲強梁所制屈而不伸無不可据法理自衛況蠶社關全川利源民學爲地方治本消長存亡影響于前途者甚大而可隱情惜已不一呼籲於大人先生之前徒坐聽其蹂躪摧殘比于自壞財產自戕生命者之放棄其權利哉用就實習期畢例東社產物學課成績之會專遣社生賫呈各件坩鈔社中各期講義計十九種都二十冊呈請學部鑒定作爲初中等蠶業教科書暫行本飭照講授以待改良進步再頒專書別呈商部請照上海南洋公學無錫廷弼學堂之例准將公社作爲商部附屬民立實業中學堂一應固定流動貲本隨逐造冊存部由部分別酌撥飭還專摺奏請立案更委特員會同地方官查照二十九年學部批准三十年川督批准成案辦理庶可保存無缺徐漸擴張全川俱有榮施不第森楷一人之幸而已惟森楷素性愚拙歸自東瀛以來曾未一馳書疏通候聲息其達官貴仕則尤上援爲恥先施未能今忽仰首鳴號哀呼將伯固不免有人微言輕之失更不能無道遠傳譎之疑謹將本社先後奉到官文書

集爲公牘彙錄一帙呈請諸大君子俯賜披閱逐加參驗果見此社實謀公益非便私圖經已發業成名不合虧山棄井懇賞查所告困難各狀代爲籌畫或鑒其智不足爲訪諸通人或矜其力不及爲聞之當道或激急而主爭競或平和而議調停方鍼雖不必同而但能助公社自助不聽無端外侮功敗垂成森楷必當謹擇敬從勉盡義責絕不敢以意見自是身命爲辭使吾蜀實業前途隳美果而演罪劇也區區之見不盡欲言伏惟垂鑒光緒三十二年五月四川蠶桑公社社長合州舉人張森楷謹告

商部咨覆四川總督查辦社長張森楷案

三十二年七月

案查四川合州舉人張森楷創辦蠶桑公社一案前据該舉人呈稱勸辦公社漸著成效懇請奏明立案等情正核奪間接准咨稱該社桑林漸茂蠶種亦佳教習頗優儀器粗具惟學生程度太低該舉人辦法種種紕繆實不勝社長之任等因前來查該公社辦理多年規模掬具若半途廢棄殊爲可惜該舉人不孚眾望應卽責成該社另舉社長與地方官接給辦理以期改良辦法漸收成效除批令該舉人不准立案外

相應復咨復貴督查照可也須至咨者

社長張森楷自齎新製人力連動坐纜利源絲車模型圖說赴農工商部請予驗收立陳借款五萬金試辦社生徧往全川布種敷教抵溺煙土利益策製爲本社歷年貼價細數表本社墊款津貼三年統計表本社還款獨立三年統計表本社教成七年全川發達倍數表請予查核奏咨案并批三十三年十月○森楷案此案最爲本社極有鄭重視之憶曾彙存一處以備森楷平生經世之務此其見端而爲日過久徧檢篋筒求其原文迷不可得甚爲恨惟批尙存于文牘雖無圖說尙有模型此連動車除各機器絲廠外較小之廠無不用者再爲說明俾人勿忘其爲蠶社之遺固一紀念也至布種敷教之策實屬可行今仍照所經營記憶製表留俟後人殆亦所謂溺人必笑者邪蠶界有人尙其諒我部批如左

農商部批三十三年十月

据稟暨附送表冊圖說成績各物品均悉該公社辦理多年規模恠具所出社產物品既均著有成效果能妥慎經理逐漸擴充洵足爲振興實業之基礎詳覈該舉人所陳情形歷年辛苦經營備致困難自是爲熱心公益起見其志洵堪嘉尙仰候據情咨行四川督飭查明原委責成本地方官合力維持彼此埽除成見妥籌改良辦法俟復到再行核奪仰卽遵照此批右批四川揀選知縣合州舉人張森楷知悉

湖北候補道宋育仁等公呈農工商部請照章獎勵社長張森楷案并批三十三年十二月

爲勸辦公益卓著賢勞公懇援例給獎以示鼓勵而利推行事竊川省實業蠶桑爲要現奉禁種鶯粟尤宜以此補農利之不足特非講求有素成效尙難遽期茲有揀選知縣合州舉人張森楷于光緒二十七年招集民股在該州大河壩場設立四川蠶桑公社由眾公舉充當社長迄今七年學生畢業三班前後出充各處分社教習技師二十餘人皆各著有成效所產繭絲棉種綢料等品歷經呈前川督錫前學務大臣張學部大堂藥查核存案均蒙批諭獎藉并准作爲民立實業中學堂飭查推廣奏咨立案該社長仰體盛意陸續在社添設簡易蠶室復纜土絲工場女經緯絲場蠶具勸工場補習兩等小學堂藝徒半日學堂各一所別立張氏蠶桑分社婦女蠶事練習所于家以圖擴充近復自出

新思督製人力連動縑絲機車出絲運滬值價尤高該社長欲遂推廣全川議將社製蠶種酌量分送各屬照派學生前往教導飼法隨宜改進竝不收取種價教俸藉廣流傳民間領種所獲之繭或有佳良如社繭者特照市價每斤加錢一百文買入縑絲示相優異具見該社長熱心公益實謀溥及洵川省不可多得之才其尤難能者公社財力單微據其歷年決算表實已用銀三萬九千三百餘兩除收公私股銀一萬兩零餘皆該社長籌挪借墊及售社產物品獲價填補支持前署合州陳牧夔麒鑒其困難曾爲通稟各憲請撥本州奉文裁革之門印書役所佔稅契釐頭銀一分以爲社中經常的款甫經奉准行知旋爲後任州牧謂其不便于己不肯照撥設詞朦請銷案并陰肆詆毀于川督之前此川督據咨鈞部以該社長不能勝任所請立案應不准行之文所由來也該社長雖遭挫折初志不衰自初至今未動公家一文社業猶然發達所籌推廣之法果能如其預算僅貼補銀五萬兩於十年內外足使全川絲業增添價銀至四千萬兩因微果鉅奇確堪驚但非社力克勝特爲請願理由書轉向職等要求解決設法護助職等公同籌議

謂其效果已著願力尤閎非藉扶持曷勝艱鉅伏讀本年六月二十四日上諭凡有能辦農工商礦或獨力經營或集合公司確有成效者卽予從優獎勵七月十三日鈞部奏定爵賞勳章章程第二條此項爵賞以所辦實業能開闢利源製造貨品擴充國民生計者爲合格八月二十八日奏給商勳章程第三條凡能創作新式機器製造土貨格外便捷者能造新式便利農器或農家需用農器價廉工省者均擬獎給三等商勳賞加四品頂戴第六條其有所製之器所辦之事成效卓著實屬特異者應由本部專摺奏請恩施量加優異以新觀聽見朝廷注重實業諄諄勸導如恐不及今該社長所辦蠶社及附屬學堂工場分社等項具有出產物品及報告成績表冊所造人力連動縑絲機車具有模型暨繪圖說明書均可逐一覆核詳加攷驗似與諭旨獎章尙相符合可否查照學部原案逕准作爲四川民立實業中學堂飭司立案以後一切事宜具照定章辦理并援近年實獎咨議議員銜職事例專案奏獎以資鼓勵出自鈞慈所有上項事由除該社長自賚呈驗詳細具陳外理合公具呈懇伏祈俯准實行全川幸甚謹呈

呈悉前據四川合州舉人張森楷將所辦蠶桑公社成績物品并人力連車模型暨各項表冊呈送到部當經批示在案茲復據該道等歷陳該社辦有成效公請奏獎前來查公社初辦多年具有規模該道等居同鄉里見聞較確既據合詞呈請可見該舉人熱心公益輿論咸孚所有請給獎敘之處應候本部彙案辦理至該舉人所呈請願理由書業經咨行川督妥籌辦理矣此批三十四年六月二十四日奉到

成都商會

總協

理

花翎

三品銜

江蘇候補

正堂

秦

為移請事

光緒三十

四年六月十三日

由郵政局遞到

農工商部給發

四川揀選知縣

合州

舉人張森楷公文

一件飭由敝會轉給承領

查張森楷現在貴治舉辦

蠶桑公社應將此項部移文送案煩即轉給祇領以重要公為此移請

貴州查照辦理賜覆施行須至移者計移送農工商部文一件

社長張森楷上新督趙亦異請准實行布種敷教抵補煙土利益策

即此

三十三

年

以上農工商部及新督陳夔龍者皆見嘉許以為可行而部

咨到川為署趙亦豐覆以無款可籌不行陳夔龍未到任而他調遂罷論森楷心終不死以謂此固張齊賢之策條可也聞趙亦異授川督素嫻吏事亦頗開通及其入川之始遣人要于川北之太和鎮查蠶社之舉此又蠶社一大轉關也

合川縣志卷二十

蠶業下

三十五

竊惟蜀位西南壤鄰滇藏英闕法伺險象環生朝廷塵念西南三易閩帥乃得大人兄弟先後繼任人士望風自效不乏偉論嘉謨足供采擇鉅待細流土壤更贊高深而森楷切切不已于言者非有利祿思想自比囊錐實以賦性迂愚疑彼挾策者流或皆急于治標不及本計僅一時之利非百世之謀無以副大人之求饜蜀民之望也竊不揣其禱昧略就職業所在時勢所須逐具理由梗槩為我大人揚榷陳之蓋蜀為古蠶叢之國亦號錦城固絲業殖產地也人亡政熄法意遂微迺以絲名讓諸吳越價值亦出其下遠甚故中世以降蜀人之以絲富者未有聞焉近歲遂以煙土代之跡其邪種蔓郊毒漿浸布不可謂非世界一巨蠹也顧其代價綦重沾漑良多稅釐所徵歲至五六十萬其於民生國計亦或少有裨諸森楷獨私憂焉謂是漏脯癩饑鳩酒止渴不可不有以易之爰于庚子中冬議以民股民辦初立四川蠶桑公社于合州大河壩場延師招生研究新法期以改良桑種蠶種絲業棉業能敵煙土歲入為度初猶以為風氣不開股款難集目的雖懸未敢謂必達也既而父老矜其勤苦官師鑒其愚誠慨貸私金許撥公款即未能免左

支右絀之患尙不至貽朝開幕落之羞困苦艱難經今七歲學生畢業已及三班出充夾江犍爲威遠富順樂山仁壽華陽綿州潼川南充劍州巴州南川巴縣涪州江北等處分社教習技師前後二十餘所省憲有所激刺亦立農政總局大課民間種桑以相應和而特延本社教習爲之主動則影響所及雖非甚鉅亦庶幾椎輪大路有開必先矣使遂由此繼長增高擴充推廣上無抑壓下靡旁撓社力所能及者爲輔而翌之社力所不能及者爲呵而護之則公社之法普及全川人力所通財源斯濬卽微禁煙之令吾意煙土之利早爲蠶桑取而代之也無如社款艱難時迫呼籲偶迴長官之聽卽傷下吏之心因出死力相傾必使動輒得咎所有困難事狀具見拊陳宣告書中繇是侵侮頻仍效用損失生徒以無獎之故輟學時聞脩膳爲自費之資逋金屢告外館來聘或違議約之章分社見欺至得拔桑之禍土種不經攷驗敢仿式以流傳初學尙待研求遽開堂而講授揆諸文明之例均在厲禁之科自稟牘無功而範圍以潰失敗固非意外譏評尤出望中蓋以疑新法無效者多知僞學失真者少吠聲吠影傳信傳疑于是公社之名蠶桑之

學乃不大爲社會所歡迎顧欲以易其利用煙土之情殆憂憂乎其難之矣夫蠶桑不足以易煙土在因循之世僅邪正相戰于無形正不勝邪猶可言也當改革之秋利害實被于當局利不敵害不可言也今禁煙之令旣嚴切實行矣蜀中種煙之農販煙之估吸煙之庸眾開煙館之莠民倚煙事爲活之下流裸類無慮數千萬戶一旦盡奪所習不顧其安彼等計無復之豈能束手坐斃萬一鋌而走險亡命爲羣誅不勝誅治則難治言念及此可爲寒心就令煙民馴愚無敢異計而因其營業之不正使之無業以爲生此蚩蚩蠢蠢之氓幾何不委爲溝瘠蕩爲遊魂乎其幸免于溝瘠遊魂度亦畏首畏尾餘身無幾求如曩時之抽捐攤派爲數良多默計吾煙尙存輒敢踴躍應命者固不可必得之數已苟上之人不及此時慮其代匱籌所變通竊恐財政困難一部分之不靈勢將病及全體治蜀者雖神聖當無如此疲民何也顧或者謂蜀中土產若鹽若茶若麻棉煤鐵等並貨殖有名之品亦實業應究之端何必蠶桑斯敵煙土不知鹽釐重困難再擴張茶貿衰微方求改進麻棉皆沿舊法煤鐵從無新機理想卽佳實驗未試保無糜費何云代興

唯蠶桑立社以來成效漸彰聲譽亦著近雖小有晦暗猶于大體無傷連歲製出細絲發商外銷頗爲歐美所推足與蘇杭相抵森楷猶恐多費人力有礙經濟特督學生魯沃自出新意試造人力連動機車工省技精略同機廠運售上海看價尤高若能一律改良蜀中絲業當在中國占一最優位置微惜社產有限未成大宗名若可專利實未溥此不能不內顧歛然者耳森楷用是日夜思惟謂必廣其傳于人間斯能收其利于海外特恐人之不相知不相信也則擬布種敷教不取其資收繭繅絲特增其價以逢迎其坐享樂利之心又恐人之不見利不見功也則合基本息金詳徵其數內銷外用併計其需以密合權衡子母之算因爲本社津貼細數撥款統計還款獨立發達倍數四表窮原竟委虛往實歸大致以五萬金經營三歲日增月累迄至十年絲釐之收已抵土稅過半古人有失之東隅收之桑榆正謂此也惟以民社爲之毫不假借官府則不特事有不可亦實力有不能且夫民可自爲而輒求官者妄也民雖自爲而非官不濟竟不求官者迂也不妄不迂而望官過重責官太難而使官猝無以應其求者亦乖戾而無當也今森楷于

蠶桑事懲前毖後幾不敢復有求矣然負累滋深既無家可毀交游寡少又鮮富商巨賈可以緩急相通國家復未設官調查量給補助資金使能相與成立則唯籍社產歸諸官由官委員接辦款項饒裕聲氣靈通策之上也或官無暇及此仍由公社自辦應請查前憲錫准撥州局餘款銀一萬兩入社由州官于門印書役分估稅契釐頭銀一分儘數劃撥歸還之案不拘年限以成爲度策之中也否則指撥發商息款如表列數飭社具領由社自請殷實紳商代爲擔任或社產抵押勒限歸還官但保護餘不過問又其次也凡此三策并于社事有裨于公款無損森楷不佞誠得有所藉手爲之傾心卽不以蠶業膨脹蹂躪世界自期而于盡易川種高售川絲之效必得當以報大人倘有意乎如慮森楷人微言輕不盡可信無妨姑一妄聽存俟莅蜀之日委員查驗或有一言不讎甘受誑騙之罪苟其不謬大人所以爲國爲民并爲實業勸者其有道以處之矣不盡欲言伏惟亮鑒森楷再拜

辦理四川全省商務總局札飭合州會查蠶社辦法文

三十四年六月

案奉督憲札開案据四川蠶桑公社社長合州舉人張森楷稟稱勸辦

蠶社歷今八年迭經風潮僅克成立現在桑種蠶種絲業棉業各項效果竝著風氣漸開惟社產之絲年僅五六千兩運滬外銷頗爲洋商抑制未能善價而沽不足歆動方外人發達尙非極點去秋特出新意督製人力連動縲絲利源機車工省價廉出絲勻細甚合農家之用業造模型車式赴農工商部呈驗兼報本年成績經蒙照章核獎咨請護憲推行森楷亦別議籌布種敷教之策劃爲預算四表謁上督憲陳請爲撥款試辦幸獲面邀恩諭俟到川後酌量實施森楷隨卽西還俄值春期開社諸務待理未及馳謁省憲稟商所宜輒就自畫原策實行派畢業生赴銅梁定遠壁山江北江津三台射洪蓬溪遂寧南充廣安西充墊江奉節犍爲等屬勸立模範蠶室坵散種紙及蠶業白話加以演說卽留該室飼養仍約外間領種之家持繭來售優價買入縲絲俾與社絲合一成爲出洋大宗繼長增高得價必善不圖部署粗定陳憲他遷謀議頓成空言款項更無實著各屬派出學生紛以書來詢問買繭縲絲之說究竟如何手無斧柯負負而已側聞大人行能望實迴出輩流秉節西來全川托芑區區蠶社詎或遺諸祇以森楷贛愚不善事上鑠

金銷骨久戰官場或被先入之言不無後時之懼爰於暮春下浣郵上一書籲陳斯事据覆到鄂之日適當入蜀之時錯迕不逢良深悵歎因要半道更補前牋併坵原上陳憲書稿暨所坵表及宣告書懇於卸裝餘間一爲披覽卽委廉明幹員臨時到社查督如果所言不謬尙在可受培植之列應乞查照書內籌款三策量出一途俾得有所憑依漸達公利目的幸甚感甚伏維進止不一等情据此并坵呈原訂章程一冊預算表一冊宣告書一冊查川省地土宜桑鶯粟減種尤宜多植桑株歲收蠶利以償所失是以研究蠶桑實爲本省近今最要之事張紳曾赴日本及江浙調查當有心得公社亦開辦最早如果辦理尙屬得法成效漸臻自應官爲維持以免廢置半途俾各屬得所模範卽或辦不得法而該社報部有案歷經籌撥鉅資亦應官紳化除成見妥籌改良斷不能任其有始無終貽笑局外爲此將坵件札發札到該局速卽遴選公正明幹之員前往該社切實調查并由該局核擬辦法詳奪等因奉此查張森楷提倡蠶桑事業實開四川風氣之先用功甚多成效頗著惟不應與本地官紳動輒抵牾以致自生阻力如欲維持該社必須

先查該社歷年辦理之成績再該社歷年出入之款目然後爲定以後主持當用何人改良當用何法除札委候補知縣沈令克剛蠶桑畢業生鄭濂外合行札飭到州仰該牧即便遵照俟沈令鄭生到日會同先由鄭生將該社開辦以來築社立廠購買器具所栽之桑所養之蠶所繅成之絲是否合法及歷次畢業各學生試驗成績優劣逐一分類詳晰調查一面由沈令調集開辦以來進出款項簿据傳集該舉人及本地著名紳士到場分別該舉人自有股本外招股本公款補助售絲售桑盈餘四項逐款勾稽究竟入款若干歷年用去若干用去中間有無浮濫支出之際曾否與地方官紳協商每年年末曾否造報清算之後先將公社成績爲優爲劣用款爲虛爲實由該牧會同沈令爲之傳集本地紳民逐一分別當眾宣布然後另籌善後之法其法分爲三項一爲用人一爲辦法一爲款目用人之一項如該舉人再盡義務地方官紳亦加認可即留該舉人接續辦理如有一方面不願即應另籌用人之法本地有公正而通蠶桑學之士紳即由眾公推選用否則即由省局代爲物色可充社長之人派往辦法一項關於教育改良由鄭生代爲

斟酌關於庶務改良由沈令代爲斟酌要以有實際無糜費有利益無弊竇爲要款目一項如經費有著即由沈令會同該牧定一支用善法如經費不敷即應由該牧設法先爲特籌經常可恃之入款更爲嚴定不致浮濫之規則已往之事不厭詳查將來之局總宜妥籌張森楷可留可去其所辦之蠶桑公社則萬無聽其隳廢之理一時攷查籌畫之責沈令任之永遠稽核呵護之責該牧任之該牧與沈令同爲四川良吏蠶桑一事實爲四川大業務須協心同畫屏除成見贊成公益上副督憲屬望之心下爲川民救貧之計是爲至要仍將會同攷察籌辦情形迅即會同稟覆以憑核奪切切此札

社長張森楷于委員查算後自請辭職并陳推廣辦法案

三十四年八月

竊職昨奉面諭飭將公社開辦以來歷年流水帳簿八本總帳坐簿十一本報銷印簿一本交由城鄉士紳在商會公所排日核算查得光緒二十六年十一月十三日勅議起至本年六月二十日實習期終止前後連閏共九十四箇月實用去銀四萬五千八百四十九兩零除職自出股本銀一千兩外招私股銀四千三百七十五兩籌撥公局廟款入

股銀四千九百兩息借債本銀一萬八千一百七十六兩餘皆售賣社產桑秧蠶絲種及各襍項盈餘所得計自三十一年頭班學生畢業迄本年十二月第四班學生畢業約六十餘人以上各班現尙學習逐漸畢業之第五第六班學生約四十人以上共該報効銀三萬一千七百二十兩已收過銀二千九百五十五兩下欠報効及現存之絲綿等流動品銀三萬一千七百二十兩暨積存之社屋桑園器具等固定品銀一萬二千四百二十七兩唯職原經股東議給薪俸銀每年六百兩現共該銀四千六百兩初未開支并各學生外號往來銀錢蒂欠未清共合銀四千二百兩未算在內祇据上存兩款抵除息借債項尙屬有贏無絀以校報銷簿決表算所登出入之數亦自鍼孔相符支出之時均係協商社友稟官有案委無浮支濫用等弊据理而論應遵農工商部前督憲錫迭次札文由職一手經理告厥成功但自前署州樓任內職遵憲札請撥稅契釐頭銀數開罪被訐奉批飭將定案注銷不許再向公家求索分文以來不特續請之門簽丁役中稅未撥分釐卽原撥過之戶糧倉稅項亦爲學務局佔有絲毫無給社中歲入各款雖平均在

四千金內外足敷社用動支而歷年逋負綦多追呼孔急不得不量爲應酬因而牽蘿補茅醫瘡剜肉寅支卯餉匱乏之聞曾無待用之錢徒增債臺之累加以風聲不競釁隙時叢內患外憂百端交戰孤臣孽子控籲無門大槩情形具見前陳督憲意見書中職已自覺智盡能索無足爲役况復社產物品祇有此量前歲絲繭已極充分今年新造人力連動纜車出絲尤較勻細運銷到滬曾將樣絲標本呈請大實業家張季直陳少岩等公同評論謂與湖北機廠絲等可值八百五十兩銀一箱後因不滿四箱大受外商抑制迄今猶未出手低貶可想而知職早有見于斯特畫捐貲傳種敷教加價收繭纜絲各策卽預算爲津貼細數墊款統計還款獨立發達倍數四表呈請農工商部立案咨行護院查覆春期職自派生賚種分往各屬實行照辦所有困難情事經各社生報告方以補報成績等詞稟請督憲示遵時值恩委廉奉札偕來稽核壹是職之爲艱爲易爲功爲罪自在鑒中以後應宜如何改良如何進步均賴蓋籌擘畫非職所得妄干尤非職所得擅主第于札中用人一節謹就職一方面對以不願再盡義務藉釋負擔特職素抱愚誠頗以

知無不言無不盡自任現當交代之際尤有舊必告新之義敢以從前經驗所得以後理想所及不揣冒昧不避嫌疑爲我恩委廉大人台前詳悉陳之蓋以絲爲中國出口貨物之一大宗尤爲川省民間生計之一大業講求無術日見衰微中間更爲煙土所奪絲貿益以不振職十年前已切隱憂勸立公社以四川爲名固由入股各人遍及五道義不得以一州自擅亦實建議之始誓溥全川非爲一鄉一邑一身一家謀私利也萬窘千難僅克成立影響所被風氣斯開上得省設農政局爲之提倡近得州立傳習所爲之應和行徒傳與已懣初心又奉明詔禁煙杜塞毒流驅歸正業爲我張目何幸如之然查各屬辦理情形及本社遭遇狀況實事求是有未敢遽滿志躊躇者則以川省近年桑雖多而扒接無術蠶雖多而飼養無方絲雖多而縲製無法大率仍沿舊貫坐貪天功固莫能保蠶業之歉豐又何能卜絲值之高下觀于職社坵設之經緯絲場潼川之永靖祥絲廠竝由職爲發起而皆純是黃絲曾無三五白繭相助成色則其他可知矣于此而欲藉其虛聲課以實效蔚成蠶桑之業抵補煙土所失不其難乎此職長慮深思竊采漢博士

則靈不推廣則滯職去社後接辦之人或不明所以必須推廣原因僅
僅計較目前不肯些須破費以成欲取姑與之謀匪第川中蠶學永無
發達之期卽職社絲貿亦無圓滿之望直不啻舉成功而破壞之縮范
圍而銷滅之誠職心不甘諒亦恩委廉意所難忍爲此特于算明之餘
瀝陳上項理由籲懇据情宣布並照詳覆盼切施行無勝感激至補成
績請委查驗一稟似已過時無用但其陳敘推廣難處尙似詳明理合
呈須至呈者

社長張森楷遵議覆陳懇州据詳案并批

同上年月

竊職昨以遵算陳明等詞申報帳目已算款項仍艱得難再盡義務情
形沐爲復召城鄉紳糧仍在商務分會三面詢謀僉認蠶桑原屬公益
辦理果著成效應遵憲札設法籌款相與維持惟查帳項名目間有參
差冊報社產物品亦未全行點驗猶不足昭大信而示至公爰於七月
二十二日更邀局士張駿驤曹顯榮石明體易興善股東唐積深債主
魏培先等隨同委廉再到公社覆將儀器桑株各件逐一查點清楚尙
與冊報相符職亦將名目參差之處分別合併指點歸一群疑以釋輿

論翕然議請州中鐵路分公司官膏局等問餘款銀一萬兩撥入公社
作爲續添股本改由官督紳辦卽請恩廉督辦督率內外一切事宜留
職仍充社長管理蠶桑教育內容經收學生報效等事由恩選派二人
爲內外總收支管理財政應及雇用會計稽核帳目各件其社副以下
執事諸人則歸職與管紳協商稟恩作主應給股東官息債主本息酌
量緩急陸續分還或卽勸入社股藉輕負擔眾均允悅無冀當立條約
合同簽押爲憑職雖困頓憂畏亦覺義不容辭只得勉力受任經管如
故現已自照新章開社授學能否爲益容後續詳特職立社初心在於
溥利全川藉抵煙土毒害近奉禁煙嚴命尤應及時乘除若不推廣充
分不惟懷寶迷邦難達公益目的而蠶種疲滯學生技成無所用之直
同擁貨不銷握權坐斃於人於己利益毫無爲此瀝陳理由懇乞据情
會詳督憲叩求查照職等所上請願意見書及傳種敷教收繭繅絲預
算四表飭向有絲業之府廳州縣各仿立一模範蠶室或蠶桑傳習所
來社購種延師俾各得所成就裨益必多職愚昧之見是否有當理合
具呈須至呈者

批候据情會同委員稟請局憲察核轉詳俟奉批迴另飭知照

雲南試用知縣左鴻脩等遵籌公款請將民立蠶社改爲官督紳辦坵
呈合約印還案并批 同上年月

竊查大河壩蠶桑公社自舉人張森楷辦理已越七年所出繭絲蠶種
桑秧俱佳遠近向風裨益社會不淺祇以股款不齊費用支絀該舉人
上書呼籲職是之由昨奉上憲委員到州調查社學內容竝取齊歷年
簿据詳細稽核指出不符各數命紳等會同清算若論其流水坐簿譌
誤脫漏誠所不免及經張森楷逐款登答其出入大致仍不甚差且經
理社事多年竝未領支薪水家無格外餘積所借社債人所共知此時
運掉不靈幾成瓦解之局若非設法補助不獨來年收買分社繭絲無
資卽本年實習開班亦難支拄今蒙再三宣布上憲札飭其期望成全
德意溢於言表祇聽之餘同深感戴紳等誼切桑梓豈忍膜視用特齊
集城鄉管公紳糧彼此合議當均僉允并無異詞請將鐵路節存本息
銀四千八百兩盡數撥出再於官膏餘利及各局有餘公款項下湊銀
五千二百餘兩共成一萬兩入股補助合辦惟公款以此爲限不能再

加分釐以後公請改爲官督紳辦一切由地方官主持社內責任分權
擔負張森楷辦有成效應請留充社長專管蠶桑教育所有學生應繳
報効責成經收公舉總副收支二人專管財政駐社會計責成選用社副
一人駐社專管稽查襍務一切各有專司不相侵越其餘已與張森楷
訂立合同雙方願意至於辦事規則均照新改章程切實辦理已於二
十二日公舉州紳在公社與各股東宣布均甚悅服所欠社債亦須各
債主商明分別入股緩還毫無抑制公社營業在以資本養成教員工
師而收其報効以爲利近年每歲收入此項不至千金若不設法推廣
則資本仍不能收回而推廣之權又非一州官紳之功所及可否仰懇
恩施據情稟求上憲通飭各屬開設蠶桑模範室所需教員技手桑工
蠶種概於公社雇購疏通畢業學生藉可收回資本方能加意恢張日
期遠大庶無負此次維持之至意爲此公稟父台大人賞准轉詳實爲
公便須至稟者坵呈合同兩紙仍乞蓋印發還

合州蠶桑公社學堂改由官督紳辦條議合同

一此次訂立合同由奉上憲札飭爲發達蠶業保全學堂起見彼此會

商合意情愿訂立合同并無抑勒等弊所有議定各則逐條分列請示稟定遵行

二公社學堂雖經管學大臣學部農工商部批准尙未咨覆立案此後宜如何妥立名稱候官稟請批示遵照

三公社係民款民辦嗣因經費不敷疊請地方公款入股補助今復奉上憲札由合州管紳齊集熟商就地籌款所有續入股本實居多數應卽改爲官督紳辦擬請委廉据情稟請上憲札委地方官督辦俾有遵循而符體制

四合州公款續入股本仍依民股之例照數給發股票除舊入公款外此項添款至多不得過一萬兩用示限制

五公社以後辦法手續應照委廉酌定稟憲新章從事以後或有交通之處由社集議妥叶呈請督辦核准飭行

六公社現擬傳種敷教收繭繅絲之策及所預算四表應懇委廉稟憲通飭實行期必發達如公社收絲資本一時周轉不靈實在需款暫行接濟之處仍由公眾商請督辦臨時設法俾不徒託空言致令有

貨無銷諸多窒礙然須絲值相抵有餘庶免漫無著落

七公社舊章教育理財用人三項概係社長獨任今擬分別辦理蠶桑教育社長任之銀錢出入總收支任之執事人役協商相宜之人稟官札委不得由一方面私擅

八社長張森楷總計在社九十四箇月竝未開支薪水亦未立賬所謂有義務而無權利也現時經濟困難無可報酬公議酬給紅股十分之二以免偏枯

九社長公議仍請張森楷一人充當應仿官立普通中學堂例歲給薪俸若干兩卽由督辦照會或請上憲札委藉昭鄭重

十社副以下各執事由公眾商議妥叶後呈請督辦札委除會計外應於明春實習期起各以一年爲滿應得照舊開支唯理財事特重要應於原有會計之上添設總收支一員立卽稟請督辦札委其會計員卽由總收支選擇充當務必常川駐社筭理出入采買一切

十一公社原有公私股款借債本息應由總收支逐款核算明確另立坐簿爲憑

十二公社現交出社產冊內所開列之固定流動資本應由總收支逐一清查開具社屋桑株儀器家具實數暨應報効之學生粗工姓名人數專簿存查

十三股友債主應收本息作何償還應由公社於本月二十五日開社之期邀同來社面商就債入股尅期給息之議如不允承則須給賬換約分年歸還之前積欠本息均歸總收支擔負計畫但各債主亦必須及分年屆期理問不得輒据原約時期切急責償轉多轆轤十四渝號各債業將連年產絲九千二百四十兩托售指償略足相抵猶恐價低日久月息增多不敷之處仍歸總收支規畫

十五張擴端債項允以二千兩作股并張式卿原有股本一千兩作爲入股三千兩所餘少數擬卽核算本息早時歸還

十六經緯絲場房屋原係代借外銀入社脩造轉佃取租現擬將其佔用各房屋劃歸絲場其借入之銀亦有絲場自行理落不與公社相干但其房屋實在用銀幾何須憑監工詳賬爲準

十七公社桑園兩處不敷栽接桑株之用先佃靜居寺僧靜山田土一

坊已經交押因刁涉訟迄未上莊可否查飭照佃應候督辦示遵

十八公社原認未繳之股銀久作罷論唯李均平之一千兩楊繼成之

二百兩竝有親筆約憑可否飭令繳案應候督辦酌行

十九公社埭設兩等小學堂及社長內眷等所有日用火食原係社長自任有賬可憑現時既將公社絲場劃分以上兩項應附歸絲場一面以清界限

批候照錄合同章程會同委員稟請局憲察核轉詳惟鐵路贏餘早經奉文查辦併俟分別奉到批示另飭遵照合同印發

委員沈克剛知州桂良材會稟查辦公社情形改爲官督紳辦案并批

三十四年八月

竊卑職等仰奉憲台札委會查辦大河壩蠶桑公社事務彼此在州熟商調齊卷宗逐一省覽於六月二十六日會同前往大河壩蠶桑公社該處距州陸程七十餘里適鄭生濂先已到州因卽同往詳細查勘所有公社學堂內容由鄭生另文報告周視廠舍屋宇雖多半歸公社半歸經緯絲場工料均不甚堅固儀器一項價貴之物尙屬完全繭絲光

澤勻靱無異湖絲本年約產五千兩之譜出視近社及沱灣兩處桑林共約八千餘株洗滌清潔濃陰鬯茂寸草俱無接桑成活二萬餘株均學生桑師手續其餘土桑數萬所值無幾此該社實在情形也其營業宗旨在以資本養成多數教員技師桑工而收其酬報以爲利保費學生不取學膳費轉以課獎策勵之故皆講實習能力於警病辦種收繭養蠶繅絲接桑殺蟲諸務彼此競勝推行分社已有二十餘處風氣大開所售蠶種實能無病此該社發達基礎也目前經濟困難已達極點緣所籌股本交收未及四分之一七年之久東扯西填將本還利所欠股東公款本息已及萬金外債一萬數千所存社產勉敷其半尙餘一萬數千兩之社債專望學生報効一宗以彌補本年各分社送到繭絲雖四五十金之值亦無可籌措若非急于補救勢必失敗此該社經濟恐慌之現象也遵將該社歷年流水總賬取齊回州核算不特首尾不完且亦毫無條理翻擇三日乃於襍錯中尋出端緒傳集商務學務三費各紳每日擇派四人輪流清算計到五日續又撥四人復算二日僅將出入款目對明譌舛脫漏不一而足公社會計已更數人莫可究詰

三十二年以前雖報州有案渾統數宗不成冊籍每年照例結賬各股友早知負累甚鉅并無一人到社惟幸往來錢店向只一家凡有錯誤均可查對比較出入大致尙不甚差其理財用人如此無怪乎不取信於人查該舉人張森楷自開辦公社以來家產并未增多亦未別營商業惟楊柳溪植有湖桑三萬眾所共知其人恃才傲物咄咄逼人性情亦不免偏執頻年以公社籌款之故隨處責難於人冀所事之有成并人言而不畏自起衝突何能怨人此事經三次宣告城鄉諸紳深明大義均知仰體憲台成全之德意督部堂屬望之盛心議定改爲官督紳辦加款補助分權辦理邀求推廣四端其經緯絲場因合貲分股劃歸張森楷另辦多數紳糧當場簽允毫無異議此次補助之款仍照前作為股本請將鐵路節存贏餘提銀四千數百兩餘於各公局餘款酌量劃撥統以湊集銀一萬兩爲限用資周轉張森楷辦事已著成效仍請留爲社長專管蠶桑教育所有學生工師酬報責成經收另舉廉幹紳糧曹顯廷爲收支專管銀錢出入至於總持一切進退職員均愿聽命官書合約仰求憲恩札委合州知州督辦庶可以一事權惟此等營業不

進則退萬無中立之理該社此時所收學生報効及桑秧蠶種年只四千餘百金僅敷用費其傳種敷教收繭繅絲所需尚鉅若非疏通學生籌銷蠶種則學生報効一種收回有限資本不充難期遠大此實非一州之力所能支持可否仰懇憲台轉詳督部堂通飭各屬設立蠶桑傳習所需教員工師蠶種之類即在該社聘購不獨教育資本收回而蠶桑之利益愈昭公溥矣此時兩面以合同官紳聯爲一氣用敢將查攷蠶桑公社改爲官督紳辦籌定辦法用人籌款三端擬改章程各緣由理合稟憲台俯賜查核轉詳督部堂批示飭遵實爲公便爲此具稟須至稟者謹申賚章程一件鄭生報告文一件鈔稿新訂合同一件決算表社產冊成績表推廣表實習表各一件同查大河壩蠶桑公社情形擬歸官督紳辦籌定辦法用人籌款三端酌提公款藉資補助謹將更訂章程附賚文件冊表呈乞核示轉詳飭遵由

四川總督部堂趙批 据稟轉據舉人李定瑩等稟請將鐵路節存銀兩及官膏餘利竝各局款湊股補助大河壩蠶桑公社以後卽改官督紳辦等情均悉查該州路股存項等據耿守詳稱連津捐局借去之款共有五千四百餘兩當經批飭全數解交鐵路公司在案此項銀兩該牧應遵批速解斷難挪動此外各款應准如稟撥助惟既據該牧查明該公社應予補助然此次撥款無多應否另行籌款維持仍由該牧會紳商辦餘俟商務局轉詳到日再行察奪仍候分行鐵路公司商務局知照繳

總理四川全省商務總局批

稟摺均悉據陳調查該州蠶桑公社情形頗能緊要而舉所擬善後四端皆關緊要可行應卽照辦該社初辦八年其中屢經糾葛經此次澈查整頓之後庶能鞏固基礎張舉人森楷歷年堅忍成績昭著極堪嘉尙此後益堅素志認真經理不獨川省蠶業改良賴爲先導卽將來全國蠶學亦取師資規則內體例文義間有不合而本原既清流弊自少本局不取苛求鄭生濂報告書所陳各節多切當可採之語仰卽督同該舉人隨時採用以期改良而臻完美其未盡事宜仍候本局轉詳督部堂批示飭遵此繳摺二扣存

四川全省商務局詳覆遵立蠶桑公社改辦籌款情形稟

三十四年九月

案奉憲札據四川蠶桑公社社長張森楷稟呈該社辦理情形并乞籌款維持一案飭卽遴選公正明幹之員前往調查并核擬辦法詳覆等因奉此遵卽遴委勸工局提調沈令克剛由職局詳細指明辦法并派湖南蠶桑公社畢業學生鄭生濂隨同前赴大河壩地方切實查看沈令事畢先行回省隨據合州桂牧與沈令會稟前來卑職等奉委查辦大河壩蠶桑公社云云各緣由理合縷稟轉詳并坵呈鄭生報告書暨章程各一扣等情據此職局覆查該印委等所陳調查情形及所擬辦法尙屬扼要竊以合州蠶桑公社實川省絲業改良之先聲張舉人辦理該社已閱八年於原議所集股銀二萬五千兩僅收足四分之一外負債息共銀二萬餘兩統計所費不及四萬金支持八年之久社生已有三班畢業推行分社至二十餘處本社株桑有湖種三萬土種數萬之多每年售絲售桑售種之利計入四千餘金觀其用費之少如彼成績之著如此又據該印委查明張森楷比年家產并未較前增多亦未別營商業其於社款并無侵蝕可知惟其性情拙傲動與本地官紳相忤以致不愜眾情毀過其實此次議令別舉曾紳遂良充總收支經理

社款藉以接洽官紳兼可隱銷疑謗該舉人歷年堅忍成效方著仍留爲社長專任社內一切事務俾其專心教育不預交際免涉嫌怨又擬官爲督辦俾得謹守範圍亦以藉通隔閼爲保全公社之策爲愛惜該舉人之計似屬中肯惟州牧不盡得人監督或虞失當擬請自明年爲始每年六月由職局會同農政局揀選一人前往核查二次有事隨時糾正務使推行盡利至該印委懇請通飭各屬設立蠶桑傳習所卽在該社聘師購種一節雖爲該社疏通補助起見亦立全省蠶絲發達之基事屬兩益可否懇恩照准出自憲裁鄭濂報告書所陳各節頗多可採應懇飭由桂牧督同該舉人酌量採擇切實籌辦至請撥助款項一萬兩其鐵路節存盈餘一款已另奉札飭全數解交鐵路公司不能挪動其餘公局湊撥各款蒙准如稟撥助惟該公社需款甚多非萬金不能周轉鐵路之款既不能撥應并飭由桂牧遵照另札集紳籌議別於他款設法挪助務足萬金之數方能維持該公社於永久亦以激揚熱心實業者之觀念所有遵札委查合州蠶桑公社情形并核擬辦法各緣由是否有當理合繳還原件據覆詳請憲台俯賜察核批示飭遵

社副石明體等遵請

案并批 三十四年九月

情前七月沐恩及委員沈稟商務總局憲札內載蠶桑爲四川實業大宗舉人張森楷實開通風氣之先業已咨部立案不任墮廢飭恩及州中紳糧代爲設法籌款接濟等因奉此當經張駿驤曹顯榮等邀集城鄉衿糧迭次禹廟書押籌議咸請搜羅各局湊銀萬兩續股合辦先由鐵路撥節存項下銀五千兩暫行支發嗣查各局有餘始再劃撥湊足萬金之數官紳面訂條規書立合同稟詳立案札委生明體充當社副職遂良顯詢充當收支張森楷仍充社長如故生等均經遵辦職顯詢已於八月二十四日接辦該社事務殊昨奉到督憲批示鐵路餘款飭速申解總公司公社之需飭仁廉暨生等另行籌撥竊州中近年新政繁多款項支絀早在洞鑿之中一旦空此巨款不特萬金難措卽現在該社每月需銀二百八十九兩亦難救此然眉之急昨集各生協議僉謂他無餘款惟聖廟現已告竣尙有羨餘不妨於此項暫撥二千五百金以濟該急需想該首等皆係收各姓捐款亦無他議是否有當理合來轅協請賞批作主爲此稟乞

合川縣志卷二十

蠶業下

四十九

批如稟暫撥以資接濟

四川全省商務總局奉憲轉飭合州限一月內籌款萬金以資蠶局

轉札 三十四年九月

照得本總局呈詳遵札委查合州蠶桑公社情形竝擬辦法一案於光緒三十四年九月初八日奉總督部堂趙批詳悉蠶桑公社係爲振興實業造就專科人材張森楷勸辦於風氣未開之日而被謗於成效已彰之時官吏則疾若寇讎紳民則疑其侵蠹甚至謂繅出之絲毫無價值織成物品亦屬僞爲眾口謬悠使人扼腕若非此次派員澈查則張森楷之屈抑終不能白何以勵任事者之心而該公社卽不爲讒口所破壞亦爲債累所拖倒矣公社之得以危而復安者該局之力也所擬改爲官督紳辦及各章程甚屬妥善而另舉總收支專司出納俾社長專任教育每年由兩局會派委員檢查尤爲持久不敝之道均應照准鄭生報告匡其不逮應由該局轉發公社官紳採擇籌辦仰卽飭令合州速於該州地方公益各款內湊足萬金撥發以資周轉并分別移行知照至請飭各屬設立蠶桑傳習所延聘公社畢業生充當教習及購

買蠶種各節候酌核施行繳附件存等因奉此除分行外合函札知爲此札仰該州即便遵照并將飭籌款項集紳妥議限於一月內籌定切切此札

四川全省商務總局飭州查辦靜居寺佃業垣城山提業仍照原案辦理并速籌款補足鐵路解款札

同上年月

案据該州蠶桑公社社長張舉人森楷呈稱公社原佃靜居寺業栽桑又經陳前牧提撥垣城山業分別立案前樓牧任內聽寺僧單詞訴准不令該社上莊桂牧任內垣城廟會翻控并未通知該社逕往拔桑逐佃勒押還產致無植桑餘地并懇核定該社畢業學生攷試辦法等情合行札飭札到仰該州即便遵照傳知靜居寺僧及垣城山廟會仍照原案聽憑該社租地種桑并追垣城山廟前日拔去桑株原價繳還該社以廣蠶桑而衛公益其公社畢業學生有已畢業攷試及嗣後每屆畢業之期卽由該州備文申送來省聽候提學使司攷試給憑再前奉督部堂批准籌給該社補助經費銀一萬兩內有先指後提之鐵路租股餘存一款仰卽迅速設法另籌補足以符定案毋任擱延仍將遵辦

合川縣志卷二十 蠶業下

五十

情形文到十日內稟覆備查切切毋違此札

署重慶府知府耿葆燧奉憲轉飭合州新任楊署牧設法籌足萬金抵補鐵路解款行知

同上年月

光緒三十四年九月二十一日奉全省商務總局札開照得合州蠶桑公社爲全省改良絲業之先聲成效已著本年復奉督部堂批飭本局委員前往澈查爲之更訂辦法撥款維持督憲暨本局皆極力主張該社辦法期有成效此等有益地方之事官長原有保護之責乃一誤於樓牧之因忿破壞繼誤於桂牧之坐視蹶蹶使非任事者終始堅持公社早歸消滅不惟失熱心士紳之望且遏全省實業之機言之實堪嘆息現當講求實業之時合州出產豐富他日應辦之事從何激勸合亟札飭札到仰該府即便遵照轉飭新署合州楊令到任之後務須立查前案遵照院批趕緊設法籌足萬金補助該社并隨時立予保護毋任敗壞是爲至要切切此札等因奉此合就行知爲此行希該州即便遵照院批趕緊設法籌足萬金補助該社并隨時設法籌足萬金并隨妥爲保護毋任敗壞是爲至要此行

雲南試用知縣左鴻脩等照議集款懇飭結領轉詳備查案并批三十四年

竊州屬大河壩蠶桑公社初自舉人張森楷辦理至今已越七年惟股款不敷勢難支持本年七月委員到州調查社學職等會同五里紳糧并各局在公查核該社積債竝籌以後應需正款除往歲所撥公款銀四千餘兩及各股東已入銀數外尙須湊銀若干森楷當眾面議請於公款項下再集銀一萬兩入股合辦惟公款以此爲限以後不能再加職等卽照森楷定議隨請將鐵路贏餘本息銀四千八百兩今歲先行盡數撥交該社收支承領接辦社務其餘五千二百兩擬定明歲由官膏餘利及各局節存公款項下撥出湊足一萬兩彼此均極允悅竝立合同二紙當場簽押稟由前仁恩及前委員沈轉稟在案殊鐵路銀四千餘兩奉批飭令申解是以今歲應交該社之款遂無著落只得於廟工項下撥銀二百五十兩官膏餘利八百兩交該社收支領訖及森楷十月由省旋州堅持萬兩之議追收甚急職等莫何面稟仁恩酌奪因奉恩諭暫行移緩濟急用將乞丐工廠銀二千兩年終濟米銀五百兩

合川縣志卷二十 蠶業下

五十一

盡數提撥復於官膏總店撥銀二百兩共湊足六千兩其餘尙欠四千兩實係無從措辦擬定明歲撥支此次係爲原議所迫是以不遺餘力設法措集所有已交之數六千兩理合先爲聲明懇飭該社收支曾遂良易顯珣投具領銀票給存案備查并請轉詳大憲立案在該社今既改爲官督紳辦一切自由地方官主持而社內承辦紳首分權擔負所有公事銀錢絲毫銀錢爲重亦須遵照規章切實辦理不得瞻徇情面致負五里紳耆維持之意爲此公稟大老爺台前賜批飭領備案轉詳實爲公便須至稟者批查前稟府卽令遵院批設法籌足萬金補助該社据稟已籌措銀六千兩洵屬顧全大局任事熱心殊堪嘉尙從此和衷共濟以期眾擎之易舉開實業之先聲不特地方幸福也拭目俟之尙其勉旃所收銀數卽傳諭該收支等具領備案其餘四千兩請緩至來年撥交係屬實情候据情轉稟俟奉批示飭遵此諭

商務局通飭各屬速辦蠶桑傳習所卽往蠶桑公社觀法札三十四年十一月

照得合州蠶桑公社開辦以來頗著成效本年復奉督憲飭由本局委員前往更定辦法撥款維持據委員沈令及合州桂牧會稟查得該社

種桑養蠶繅絲諸法均極良善蠶桑爲四川最大之利源絲業爲川產改良之急務亟應將該公社辦法推廣至產絲各州縣一律倣辦卽在該公社聘師購種藉以普及良法推廣利源查該州縣向來產絲最多籌辦尤不可緩合行飛飭札到各州縣卽便遵照一面設法開辦蠶桑傳習所一面選派士紳先往該公社參觀成績調查辦法購取蠶種桑秧擇聘教師回籍酌選年少性敏有志實業者若干人悉心研究實地練習此等傳習所在究一理得一理之用明一法收一法之效種一桑養一蠶卽有一桑一蠶之利專求實際不事鋪張學生不必求多教室不必甚美教員管理員不在多列名目祇須有屋數間有地一二畝便可從事需費無多如果辦理認真實較他種學堂易覩成效一邑之大不難籌此微數之款辦此有益之事奉文之後務須切實籌辦限一箇月內將遵辦情形詳實具覆備查勿得視爲具文恣意延玩切切毋違此札

社長張森楷在州陳明現辦情形附陳畢業學生試卷暨各專科講義懇据轉詳請示飭遵案并批

三十四年十二月

竊公社原民款民辦光緒二十九年呈請學務大臣批准作爲民立實業中學堂三十一年頭班學生畢業沐前督憲委員會州攷試覆稱學生國文程度尙低不予按等給獎嗣二班三班學生畢業均實習生祇戴崇勝一人爲學理生未便仰煩委攷卽由職及教員試驗給憑前後出充威遠涪州潼川等處教習技師二十餘人頗著成效風氣漸開祇以股款單微社債繁重迫于本年五月上書督憲瀝陳困難情形沐派委員會查詳覆邀批飭地方官紳合籌銀一萬兩作爲公股改由官督紳辦并准以後學生畢業照章申省覆試給獎藉資鼓勵前州官桂奉札遵籌撥出廟工捐輸餘款銀二千八百餘兩之數悉入移交督辦蒞任職面稟催續指撥得官膏工廠等局間款銀七千一百餘兩共湊足一萬兩尙有四千兩無息分存各局士首議明來春限期交還外公社實支過償還德裕等急債本息銀三千九百餘兩共給本屆學理期蠶用銀一千三百餘兩租買桑園業價銀陸百餘兩詳叙另錄決算表報銷簿呈鑒其第四班學生周文郁等係于三十二年春季實習期入社扣至本屆期終已經學過實習三期學理三期足有修業時間九百餘田

核與奏定學堂章程所載中等實業學堂獎勵章第三節畢業程度與普通學堂同之文相符業于月初停課由職率同普通專門各科教習排日分科攷試外場復蒙督辦到社監試內場并當面發實習生口答問題另爲一場隨各分別等第照給印憑兼補給去冬社長在京應給未給之三班畢業學理生戴崇勝實習生彭光川等證書所有四班學生行檢履歷冊課本分數冊及各教員專科講義逐照繕呈請据轉詳以憑攷核便期招覆例獎如章惟各普通講義多用現行彙編未有特別新異學生日記已有上期飼育經過報告成績等表當時埒上應免重錄合併聲明若夫社中財政原經訂立合同專屬收支職可不問但職任社事較久入股較多合觀通盤覺有險象環生非收支一時能及見者義不得不爲我督辦借箸籌之查社債舊負一萬六千餘金職前上督憲書請貸銀五萬兩作爲布種敷教收繭繅絲成莊出洋資本固將藉此溥利全川亦期社產擴充遞年進步夙逋償淨利入自豐後僅籌款萬金猶望寄滬之絲得售善價足抵渝債督憲札飭通省徧立之蠶桑傳習所來本社延師購種買取桑秧所入之資亦補經常社用不

圖歷今三月各屬遵札來社觀法人員實在未及十數現計舊新學生除去本社留用及已就外聘各處尙餘教習技師四十九人蠶種三千餘紙槍桑萬餘株疲滯不銷值價綦鉅既苦存積過多昨得渝商永靖祥函報稱伊號停貿所雇滬客收莊擅將寄存社絲用極賤價全數售去細絲一萬餘兩僅得二千一百餘金比較去歲在滬洋商面議每箱七百三十兩之價實短一倍有奇以償該號欠項尙自不敷何能兼顧他欠尤與預算之敷懸差若不先事預籌善爲之地誠恐明年四五月間收繭不多繅絲有限售價仍賤贏利無期僅恃區區存款四千金將不必待學理期終卽至捉襟見肘周轉不靈始以責諸收支固惟相對愁嘆無可如何卽請督辦出謀亦或四顧茫茫愛莫能助祇職與社爲體退不能去進不得行險阻艱難罔知終極伏覩督憲昨批前州請立農業學堂案念及公社早著成效經飭籌濟久未具覆深慮物難兩大諭令兼顧統籌具見加意維持不遺在遠果真查知時移事易病重藥輕當必注重調劑彌縫無憾敬懇詳牘之末埒陳上項實情籲求督憲格外設法位置生徒疏銷桑種或卽就飭立傳習所之命嚴切催行或

還采借貸基本金之策寬籌預備務念力足自立庶幾利可公同普徧
有期感激何既至職歷充社長尙未支薪今秋公議報酬月奉二十五
兩揆諸權利義務之理尙不詎誚虛糜第念前路艱危將來能否支撐
有無效果均不可知似不應遽坐享厚糈供人指視兼以收支事重俸
給宜優皆各廉介自高矢言不受薪水獨職多有所取跡近自污萬一
危局不十又忽焉傾覆有人追原禍始謂由瘠公肥私必比職于嗜利之
徒同類而共譏者職尙粗有本末詎不自愛若此爲箇人計固當趁此
存銀尙在好覓替人繳還憲札敬避賢路而職顧念大局未宜悻悻自
好且又受事方始勢亦不可得辭祇得暫不引嫌姑求減責乞准免給
月薪專任義務從前支過之數概作來往算歸職覺心安人無口實幸
甚荷甚職迂愚之見是否有當理合具呈須至呈者

批希將呈情簡明分牘呈候照轉以清眉目而合體裁課册存

社長張森楷開陳蠶社應請示遵事宜九條手摺三十四年十二月

(一)本屆學理期終例行期終試驗業于初四日竣事接辦第四班學生
畢業試驗計至十八各科內場竣事照章請本州官莅社攷試外場試

合川縣志卷二十蠶業下

五十四

畢應否卽照給憑抑候申請省憲覆試分別獎勵後由省憲給憑請示
遵

(二)申請覆試應在憲署或在提學使署或在督憲署抑并通申各憲署
表册是否一律具全請示遵

(三)申請覆試僅正額內學生十許人能否得獎試後攸分此外尙有實
習生十許人雖同畢業例不申覆遂無得獎之路可否按照奏定三等
獎勵之章酌量給獎以資鼓勵之處請示遵

(四)此次畢業之學理實習生二十餘人合前三班畢業生共六十餘人
除本社留用及新受閩中達縣威遠邛州分社聘約外其現就夔府遂
甯廣安榮縣各教習尙無續約確耗潼川絲廠閉歇所聘
去四人亦應解約大約應有四

十餘人賦間當如何位置使彼等皆能自效請示遵

(五)前蒙憲台督憲賞札通飭各屬舉辦蠶桑傳習所來社聘請購種買
桑以期實行推廣現在不及十屬除以辦法經具詳覆各屬不計外其
未具詳各屬可否再札飭催抑仿前浙撫廖侍郎強迫養蠶法意聲明
來正限滿之後札限四箇月
來正爲滿卽由憲台逕遣社生資種前往該處設法

開辦務令言不虛發事皆實效究竟如何兩益之處請示遵

(六)公社案由部准歷年爲本官壅遏皆自赴部報告成績既沐憲台保護應予轉詳咨部藉昭鄭重但恐動輒煩勞或傷褻瀆可否准行請示遵

(七)前奉鈞批知有改定新章照開清單請准札飭分社暨各屬欠款學生賠繳報効學膳等費至今均未發下殊難進行又前呈請督憲鑒定之新編桑業白話蠶業白話二書訖未奉批可否賞代面請催問請示遵

(八)前遵送呈統緯三挑承知價疲銷滯有稟籲懇設法通融迄今未奉批迴情形殊甚窘急應請格外體恤俾今年內得有實銀足資周轉待至來春稍有起色卽當就市出售照數扣償能否允行請示遵

(九)永靖祥絲廠停貿有信來託覓主出打約計潼川射洪玉龍鎮三處廠屋家具可二萬金上下加以買繭貲本大致共須十萬餘金森楷無力聯絡已直卻謝惟念該廠係川絲廠改良之始森楷又爲其發起人若竟聽其銷沈以後絲業遂難復振特爲冒昧一言能否設法規復請

示遵

社長張森楷聲明請願拊請札飭案

竊職昨具摺陳蒙批條答應遵曷瀆惟職社最初建議係股東并研施觀察煥交職承辦續招成都龔司馬維翰西充王主政荃善等入股實爲川人全體組織以故刊行股票息摺圖記商標及在^{督學}憲學務大臣

^{商學}部稟案并以四川蠶桑公社爲名比于後起之民立中國公學湖南明法學堂尙屬事同一律若改稱爲合州公社固于實際無碍特恐專掠眾美或不免各道股友致有違言且于案牘票單皆須更動牽涉殊大似不如率循舊章一切較便可否賞准仍稱四川蠶桑公社并予給鈐記一方隨札發下用昭慎重其請借墊銀五萬兩以實行布種敷教收繭繅絲之策邀札飭令州中官紳籌足續股銀一萬兩又准通札府廳州縣各仿立一蠶桑傳習所均來職社買桑購種延聘教師果能比于存貨全銷所入自當較優開墊種價教俸二項卽可置無庸議祇加價收繭一層尙無著落應俟來春各傳習所孵種以後估計收繭幾何須價凡幾再就信用擔保抵押三項常例切實上聞特無發見明文殊

難依據可否先予賞批飭知示有希望原擬預算四表埒請衡裁至于歷年自費學生欠項保費學生賠項爲數甚屬不貲非皆賴騙昧良不過見職開罪官府無力與爭因而樂得延玩今若量予札飭彼見上風一轉固當勉力償負未必願受追呼可否查照昨呈名籍清單通給一札飭職社自派人向收或有始終支推准持札向該地方官請添差提追究藉重社產免壞校風所有請願事由理合具呈聲明須至呈者

(一)請查前單開各屬聘用本社卒業生爲蠶桑傳習所教習之管理官紳飭將遵札扣繳憲署之教習應報効銀改交森楷專派持札前往之原監學員屈庶蕃如數收納仍取該員押印收條詳覆銷案

(二)請于札內聲明現屆期終該監學員應往之處尙多勒限每至一處該管官紳于五日內將銀楚繳逾限卽飭令該官紳按日送旅費銀一大員送至銀足之日爲止仍送夫馬銀十大元以示督責薄罰之意

(三)各屬或有以上期業經繳社或繳交森楷舍下爲言者應取具舍下印收爲憑如無收條仍應如數勒繳免致空言搪塞其藉口他故賴繳者亦一律辦理并准該監學員赴憲署控追用過旅訟費應請照現行

例案歸訟負者照數賠償

社長張森楷約聘畢業生魯沃專任桑園教習五年限定桑葉足養蠶蟻七十兩保任功狀懇存備查案

宣統元年正月

緣公社自浙江教習期滿以後歷用畢業學生充任教習初未與訂合約頃因佃置租業事務較繁非有熟諳細密教員久于其任不能布置周到尅期成功再四審量特與報効已滿頭班畢業優等學理生魯沃訂立合同限年成效呈請簽押蓋章分別存執在案猶恐辦無效果款項虛糜職願照所支數全行賠償以爲徇私累公者戒但必財力人力日力如約獨該教習能力不及乃甘從坐或有故意掣肘慢令致期等弊係屬公社自誤非該教習之過職亦不代任咎惟該教習以爲事體過重利入益豐職與訂約祇照舊章給脩未嘗稍從優異不肯遽行擔負經社副湯紹林收支易顯珣等婉勸依約就職如果功効大彰竟與約訂無異當于原數之外另加銀二百兩以酬其勞合并聲明請予存案備查爲此具呈須至呈者

武生劉梓楨等控告社長張森楷貪得無厭恃橫武斷縷呈劣蹟十八

款懇飭澈查案并批

宣統元年正月

情自近來迭荷大憲嚴檄飭名屬舉行選舉自治警察農工實業諸要政自非妥籌的款必無以資敷布而利擴充乃州屬舉人張森楷倖中以來每恃乙榜之威大肆鯨吞之毒或船名孝廉暗設騙局或利爭炭礦致蹈殺機或辦公而要求助金或應試而強勒撥款甚至請開鹽店罔恤病民霸佃濟田只知肥己卽或有成有敗只見勢燄之薰無論爲公爲私惟期攘求必得卽間有鄉黨正紳偶一違忤輕則唾罵相加重則詞訟相累故每一北上必帶京控一二件地方官稍不遂意卽賄風憲糾參以致紳學商界畏之如虎此皆歷歷有卷可憑者也逮光緒二十六年知科舉已停復點金多術於是籍名開通風氣集民股開辦蠶桑公社使該舉人念籌之維艱果實事以求是負此多金已早收效果矣殊伊詐金在手并不慎擇妥人串同無賴之妹倩魯裁縫專制財政肆意虧挪而賬目無敢過問迨囊金告罄輒逞強梁手段估將學務鹽課三費各局款拖去四千數百金雖經樓主飭填股票其銀作何支銷作何措還亦無一紙宣布前督錫審其詭計委員協州核查賬目該舉

合川縣志卷二十

蠶業下

五十七

知奸情已露始暗買壁山劉相臣所織綢緞趕赴京部朦呈謂係該社自造經部咨省未覆去年用又告絀揣知督憲初到未悉鬼蜮上書呼籲沐憲恩憫伊頻年辛苦又值禁種罌粟欲勵此爲吾蜀之講求實業者勸也於六月內復委沈主來州清祿賬目籌款補助當經職等查其逐年流水花賬舛錯恆多如到京浮報銀一千餘兩捏名擴端不符銀一千餘兩等類甚多森楷慮或敗露則身家不保重賄沈委員婉勸州紳曹顯榮張駿驤以開辦已久曠棄可惜勉強規畫籌撥萬金囑其收效桑榆書立合約妥定規則協商稟請轉詳立案詎該舉人慮職等據實直陳自行主稿分遞上詳原稿可查職等以事既了息未敢與較不料該舉人得隴望蜀隨更上策稟立自治統計局意在霸握全局遂其囊括之計幸憲鑒批駁有專意蠶桑毋庸旁鶩之諭始行回州領去銀六千兩未及一月一撒而空復賄省垣畢業生杜祥馨廿金糾結州黨推該舉人爲首於勸學所鼓感煽動謂州屬各學堂辦理不善皆應降等將所有餘款撥歸該社又謂上憲批准之農業學堂有意抵制擬請稟銷將所提三釐半之釐頭稅亦撥歸該社竊該公社去歲撥助萬金

原約此外不得再向公家索及分毫言猶在耳忽欲將州中已成公事盡行推倒填彼豁壑似此貪婪以偏僻一邑安能蓄有窖錕應彼無厭之求況該舉人原係一介寒儒當中式時猶蕭然四壁及公社開辦後置田穀百餘石高樓大廈巍然勢家而以前入股者均未聞分獲微息且於官督紳辦立約內又捏名擴端及該舉人名存銀四千數百兩轉瞬七八年間公然有此鉅款而猶自謂七年未支薪水家無餘儲掩飾試問森楷非江洋大盜此銀詎從天上飛來迺毫不知足乘大憲稍示體恤便舊態復萌輒謂公款任我指揮予取予求誰敢瑕疵職等亦知勢赫緘默不言第念州中現在習藝自治消防諸大端皆因款絀棘手若任漫無限制公私交困敗壞何堪只得將森楷貪婪欺世各款另摺縷呈除逕稟督憲外曷無仰懇恩廉飭該社將帳簿交出澈算明確如有侵蝕勒令該舉人如數賠還以重公款全州沾感無既稟乞

督批

二月初六日下

所呈各節詢據張森楷逐條稟覆謂係練總張駿驤挾

嫌支人誣告堅請實究虛坐乃傳訊該呈等僅有練丁張吉成一人供稱係張駿驤派其來省投遞候批呈內各節并不知情臨行時劉

合川縣志卷二十

蠶業下

五十八

梓楨亦未向其說話等語則張森楷所稟不爲無據該呈等既來轅遞稟卽應親到候訊三十餘人中竟無一人到省其爲情虛畏審砌詞誣讎顯而易見仰合州將駿驤及呈內有名之人傳案嚴加申斥以示簿懲此批

二月初三日

職員徐澤周等稟州校覈實業懇專責成案

宣統元年正月

竊當今生計世界誠宜于實業競爭但必辦事之人覩指知歸計本算息定經費之限制尅成效之準期乃能款不虛糜事皆實濟若不真誠謹慎惟務揚厲鋪張經濟之理由罔知利權之狂熱徒盛所有用人行政都似植黨營私此卽奉上而行猶當量加裁酌況無明文可据詎宜自用自專此吾州實業之途職等所不能嘿息者也查州中向無實業自舉人張森楷以民款民辦之四川蠶桑公社稟經學務大臣批准作爲民立實業中學堂始有基礎觀其印行章程預算前後四年共須開辦經常費用銀二萬五千兩期成畢業學理生十人實習生及粗工四十人均各以種接桑一畝無蟲養蟻蠶五錢無病繅細絲十斤無類製淨種百張無毒或通專門講義十九科無闕爲能訖今辦理八年學理

實習學生已及四班畢業粗工人數尤眾僅實用過原招私股銀五千一百餘兩續公股銀四千九百餘兩下餘應支之數皆由社產售價暨該舉人借墊而來本州從學各生歷係保送公費未嘗一強州人籌膳學貲爲自營地也今秋督憲查知該社苦累情形批飭地方官紳合籌銀一萬兩改爲官督紳辦俾輕負擔通其祇得預算數十分之九而時間效果則一倍過之該舉人猶復意存撝謙不以奉有准作中學之部文飭充社長之憲札要求本官優其名實其近三年來所收兩等學生皆過百人所養春蠶蟻皆至三十兩以上而其教習執事等費歲不過一千金并計課獎火食脩補襍費約四千金而止明年訂請特別教習責以二年之後歲出桑苗三萬株四年之後歲出桑葉二十萬斤五年之後歲養蠶蟻七十兩亦僅給以照章應得每年一百八十兩之脩不肯絲毫多予且仍加具保任結狀願賠虛費近因憲札失效滬絲無價恐或社用不支呈請裁除新議給之社長薪水復盡義務雖若矯枉過正而挹其餘風固足使諸大夫國人有矜矜式矣不圖未奉批准之農業中學堂已得監督照會之張駿驤所爲適相反焉查張駿驤一行作吏

初未明農祇得舊視學張德紳之推薦得充總理蠶桑傳習所事曾不問及有桑幾何有室幾何蠶如何養種如何製惟豔公社學生之盛種價之優亟思出力爭競商請桂官勒令各場籌費送生每人各二十兩有不應者追呼從事以致新建房室多間用銀三千兩至一蠶室約有學生六七人已犯養蠶大忌又因無桑之故僅飼春蠶二兩一學生所飼蠶蟻不及三分無論優劣如何俱不足爲手術其所中無乾濕計無顯微鏡僅寒暖計一具爲上下蠶室十間公用內外溫且不知何憑製種攷驗乃于四五月間遽遣人出賣蠶種故較社價少三之一以相抵制經社生僧聖體查實詰問觸怒致遭鎖責肇釁有案公社尋邀省委昭雪駿驤志不得逞則與桂官祕謀擬躐升爲農業中學堂駕出公社之上會奉學憲札飭駁斥該傳習所撥用學務款項爲不應爲州紳懼千未便無敢附和駿驤獨用一己出名具稟在德紳手撥出舊賓興局及公社定案之三房稅契釐頭兩次年款銀三千八百餘兩坵草章程呈由桂官轉詳去後使用中學體制分其所中學生能開筆者爲甲班未開筆者爲乙班各三十許人添請普通教習多名一律授以程度不

合之理化算數無干實業之東英文言等課濫支薪脩無算以爲自己加俸及援用黨人各執事地步留省學生聞之謂無理取鬧特開同鄉會議聲明層憲批駁之意馳函諫阻兼囑與張森楷協商酌辦殊駿驤自以爲是更患失之輒乘新舊交代之際愆令桂官預印頂稟朦懇先予監督照會意謂藏身既固事在必行及再奉憲駁斥指禁駿驤妄更擬章飭恩率同州視學員往勘決議竝合蠶桑公社通盤兼顧統籌適新視學王承勛捧檄受事算出存款不敷請恩集眾籌議舊視學張德紳在勸學所聲言求恩准將原款提還以維學界時駿驤有事未預森楷等在場慮款全還則傳習所無憑著手勢將中廢只言稅契釐頭一項應照定案還勸學所備用資興一項可聽留傳習所藉相扶持恩及紳耆秦嘉澤梁權智等竝以爲然議遂解決詎駿驤未滿所望翻挾德紳悔棄前言聯稟爭執新視學畏忌公論不予蓋鈐駿驤遂擅訂請教習執事多人厚樹黨援坐待攻戰現在雖未得上准行但其勢已成立非恩主持公道職等有何權力能遂挽回惟念預備立憲時期國民皆有言議之責竊聞憲法大義有應享之權利卽有應盡之義務竝有應

負之責任今駿驤不顧公議專欲躡立農業中學堂自爲監督所訂教習執事人等應得薪俸皆較公社爲多似應比照公社辦法責令出具甘結一紙保明所辦學業每年除收費外應貼公款幾何由何局所支應限定幾年觀成所得效果程度奚似在年限內不得遷就他事限滿無效作何賠償之處與公社原具結狀一并分存州署及各憲署立案用專攷成否則攘往熙來一闕散去利歸各已害及公家職等卽甘放棄不與責言恐州人眾多必有起而執其咎者可否飭辦以杜訟端出自恩裁未敢擅便謹合詞具陳伏乞

無批

社長張森楷陳請轉咨案

宣統元年二月

緣光緒三十二年職自遣齋上期社產物品全年成績表冊到京呈請學部攷驗奉批品物已交商部附陳列所成績表冊存查三十二年復照分呈兩部無異三十四年上期職社借墊款項派遣生徒分赴重夔潼順等屬勸立蠶桑分社實行布種敷教收繭繅絲之策均各著有成效造冊具報到社至下期中畢業事由社查察無誤并照繕錄計呈當期本社分社春夏飼育各成績表二冊白繭二匣細絲一匣絲棉一匣製成

衣褲一套應循向例報請農工商部存案備查但念職社民款民辦去秋承委查明飭添公股萬金改由官督紳辦冬初新奉憲署管理一切自與前日了無系統自由冊報者不同謹親齎呈上項品物表冊各件叩請據詳咨報備案除各物品于開勸業會時先交農務課員照章陳列下期學理成績表冊另呈學憲咨學部外特將上期成績表冊二本專稟陳聞伏乞查核并各品物轉詳咨部須至呈者

社長張森楷呈請發訴案

宣統元年二月

竊職昨奉面諭州屬有人聯名列款訐職罪狀等情不勝駭異隨即查知狀首職員劉梓楨住科甲巷義成店因到該店訪查乃知係練丁張吉成奉其練總張駿驤之命來省呈遞問劉梓楨何人答以不知亦未到省職始覺為該練總張駿驤挾職前赴教育會議從眾否決伊以私意擅立農業中學堂樹黨濫費公請取銷之嫌無可發洩特嗾劉梓楨等否砌何詞意圖中傷其事是否屬實應請勒提原告全案到省質訊究坐攸分其投遞練丁應否先行傳問或飭扣留待對出自憲裁非敢瀆請唯查新頒民刑訴訟法均有官廳送達書類之條謹援請將劉梓

合川縣志卷二十

蠶業下

六十一

楨原詞飭抄發職查閱俾得逐條辯訴及時歸案審結無任沾感須至稟者

社長張森楷開陳社事問題四條呈請督憲示遵

同上年月

(一)酌核名實 實業固不為名然察社會心理實不敢謂來學諸生皆係安而行之絕無利而行之之念襍其中也公社四班學生畢業奉到勸業道批飭由州官莅攷無庸送省覆試自應遵照惟須聽候會同提學辦理則似猶用學堂體制未即取銷此後應遵批比照省垣農業中學堂分設豫科正科別科諸目以期兩利俱存或應注重實習改作為實業中學堂補習完全學科請由憲天奉咨立案究宜出於何途能使公社名實兼收學生亦不失其希望無致解體之處恭候示遵

(二)量飭定案 公社通常經費原經前署州陳通稟各憲請撥戶糧倉房所佔中稅銀三釐四毛繳由學務局轉交公社作為公股■歷辦有案嗣為樓牧訐稟註銷其款遂為公立蠶桑傳習所借撥支用公社無權過問以致負累多金去蒙憲天查明飭先籌撥公股萬金償還急債餘候推廣再議適提學憲據省視學稟報駁斥傳習所不應提撥學款

札飭另籌傳習所管理張駿驥恐失利權卽在州視學張德紳手全撥該款竝舊賓興局款入所自支仍用一己出名稟勒前官桂請升該所爲農業中學堂迭奉憲天學憲批駁猶敢朦充監督濫用重金延訂教習九人執事十一人更出廣告貶價招生陽藉溥及爲名陰實抵制公社職恐勢難支柱亟自稟辭新給歲俸願以現有教習學生併歸該中學堂講授學理另具期限五年有效酬勞無效賠償之責任狀專辦本社實習示無推諉州官特囑教育會長邀同紳學商界公所集議僉以駿驥擅專浮濫嘖有煩言駿驥自願取銷中學堂復爲蠶桑傳習所兼農業試驗場所有私撥各款另立農業局派首管理分成撥濟當官立案無異詎昨忽聯多名控職各款遣丁密遞類似含沙雖可提訊證明實究虛坐要其不欲立案之心實已肺肝如見擬卽辭退自屏寬間惟奈社債未清存款無幾茫茫前路誰任替人惟有懇叩憲天量度上項事理札飭州官仍照陳牧原稟定案俟得經費有著職卽奉身而去射的不設風潮自平是否可行恭候示遵

(三)維持利權 蠶業之利在於絲而絲有肥細之分其利有遠近之別

要非自握其權不可公社初辦係縑肥絲歷供壁山劉氏織綢之需頗獲優價嗣念手術不精未足爲川絲模型且慮狃於近利異日蠶學普遍絲貨擁擠卽不免有跌落之虞乃改縑細絲交渝商永靖祥號寄滬試售每箱得價五百餘兩躍超湖絲之上差慰寂寥旋出新意督造人力連動絲車出絲尤勻親賚到滬請實業大家張季直等評議許價八百五十兩一箱洋商顧以貨少爲嫌祇出價七百三十兩因循未售延至去冬永靖祥號停貿滬莊趁勢乾沒誑報三百五十五兩一箱盡將存絲全數售去貶價十之五六殊出望中刻正訟爭未知何解今若續縑細絲則公社產量有限萬難一蹴加多詎能在滬安莊自爲經售若復縑肥絲則學生手術現嫌退化自此遂無白絲出口蠶業卽極發達終亦勞而寡功計無復之惟有叩懇憲天飭勸業道就永靖祥潼川縑廠基礎設法整理化商爲官俾將來絲業大宗凡出口者皆得有所依附別在重慶商埠設一聯合振絲廠札飭各蠶桑傳習所一律數繭縑絲經由官廠查驗無異乃許運售如此則可合散爲整積少成多權不授人利操自己之一道也如何維持恭候示遵

(四)刻求成效 去秋憲札通飭各屬試辦蠶桑傳習所限四箇月一律成立爲提倡推廣至意現在遵覆辦理情形及實來社調查延師購種買桑而去者尙自寥寥因有擇用日本留學省校畢業生徒竝其地本無蠶桑或難籌款等情不同不必皆爲因循敷衍但今限期已屆轉瞬卽到蠶時猶未確立始基何從望收效果此誠全川絲業前途興替關鍵失今不圖後益荏苒明知設法綜覈憲天自有權衡惟職一得之愚竊謂事果必行自當實求成效擬請再賞札飭除去業經詳覆聲明該地無桑無款實在貧瘠各屬應與緩行不計專就已報遵辦暨雖未具報而向有絲業等屬切望飭將其傳習所所坐落方向蠶屋間架教師履歷生徒姓名業務時間科學鐘點逐一詳細列表造報竝令該教師開具現桑若干養蟻幾兩能得繭量幾何種紙凡幾細絲多少之預算清單勒限文到幾日連表坵上以便飭勸業道轉照農業學堂教習執事商定本年各傳習所縲製廠經通用幾繭統列何等期令出口絲貨一體劃齊既免參差亦佔多數期不受制外人利權可回矣蓋以蠶學內容已非徒知形式僅習門徑者所可勉強僞爲攷數縲絲之規定非技師手術精熟萬難辦成一律又復刻以成效責任則雖學理尙可實習較差之學生亦不敢于冒昧承認而職社去春墊款派往順潼夔等十四處布種敷教之畢業學生均各著有成績表冊另詳現更畢業三十餘人亦復能力相等若蒙查照前浙撫廖侍郎強迫蠶學辦法札派各生前往有蠶桑業未設傳習處所勸導設立仍限定于蠶室器具等常備品教師學生等消耗品外依据蠶桑經濟成例計絲支費乘除相抵當必有以自效不至耗不舞有辱羊公否則相須甚殷相遇甚疏且循以僞行人將致疑憲飭行係爲位置社生起見非謀公益溥及則傷憲天知人之明職固不敢出也特職社尙有夙逋不能再墊費用究應如何恭候示遵

坵再公社迭奉學務大臣農工商部批准立案因職不學無術開罪有司未蒙省錄歷年社產品物成績表冊皆職自遣報部現邀慈恩庇蔭不啻孤臣孽子徘徊岐路忽得依歸固當歡喜傾投一切聽命昨賚光緒三十四年本社及各分社成績表二冊繭種絲棉四匣投懇勸業道需轉詳送部奉諭自呈請示以省周折謹坵陳明如蒙允行隨冊繕上